

ЎЗБЕКИСТОН РЕСПУБЛИКАСИ 12-13-сон
ҚОНУН ҲУЖЖАТЛАРИ (200-201)
ТЎПЛАМИ 2006 й.
март

Ўзбекистон Республикаси Қонун ҳужжатлари тўплами беш бўлимдан иборат:

тўпلامнинг биринчи бўлимида Ўзбекистон Республикаси қонунлари ва Ўзбекистон Республикаси Олий Мажлиси палаталарининг қарорлари эълон қилинади;

иккинчи бўлимда Ўзбекистон Республикаси Президентининг фармон, қарор ва фармойишлари эълон қилинади;

учинчи бўлимда Вазирлар Маҳкамасининг қарор ва фармойишлари эълон қилинади;

тўртинчи бўлимда Ўзбекистон Республикаси Конституциявий судининг қарорлари эълон қилинади;

тўпلامнинг бешинчи бўлимида вазирликлар, давлат қўмиталари ва идораларининг Ўзбекистон Республикаси Адлия вазирлигида давлат рўйхатидан ўтказилган норматив-ҳуқуқий ҳужжатлари эълон қилинади.

+

-

МУНДАРИЖА

Биринчи бўлим

100. «Тадбиркорлик субъектларини текширишлар сони қисқартирилганлиги ҳамда текширишлар тизими такомиллаштирилганлиги муносабати билан Ўзбекистон Республикасининг айрим қонун ҳужжатларига ўзгартиш ва қўшимчалар киритиш тўғрисида» Ўзбекистон Республикасининг 2006 йил 23 мартдаги ЎРҚ-26-сон Қонуни

Иккинчи бўлим

101. «Ўзбекистон Республикаси Президенти ҳузуридаги Судьяларни танлаш ва лавозимларга тавсия этиш бўйича олий малака комиссияси фаолиятини такомиллаштириш тўғрисида» Ўзбекистон Республикаси Президентининг 2006 йил 17 мартдаги ПФ-3725-сон Фармони

102. «Қишлоқ хўжалиги ишлаб чиқаришини давлат томонидан янада қўллаб-қувватлаш чора-тадбирлари тўғрисида» Ўзбекистон Республикаси Президентининг 2006 йил 17 мартдаги ПҚ-304-сон қарори

103. «Халқаро шартномаларни тасдиқлаш тўғрисида» Ўзбекистон Республикаси Президентининг 2006 йил 17 мартдаги ПҚ-306-сон қарори
104. «Шахсий ёрдамчи, деҳқон ва фермер хўжаликларида чорва молларни кўпайтиришни рағбатлантириш чора-тадбирлари тўғрисида» Ўзбекистон Республикаси Президентининг 2006 йил 23 мартдаги ПҚ-308-сон қарори

Учинчи бўлим

105. «Ўзбекистон Республикаси Хукуматининг айрим қарорларига ўзгартиришлар киритиш тўғрисида» Ўзбекистон Республикаси Вазирлар Маҳкамасининг 2006 йил 24 мартдаги 51-сон қарори
106. «Истеъмол товарлари улгуржи савдоси тизимини такомиллаштириш чора-тадбирлари тўғрисида» Ўзбекистон Республикаси Вазирлар Маҳкамасининг 2006 йил 27 мартдаги 52-сон қарори

Бешинчи бўлим

107. «Маҳаллий солиқлар ва йиғимларни ҳисоблаб чиқариш ва бюджетга тўлаш тартиби тўғрисидаги йўриқномага ўзгартиришлар киритиш ҳақида» Ўзбекистон Республикаси Молия вазирлиги, Давлат солиқ қўмитасининг 2006 йил 24 февралдаги 21, 2006-10-сон қарори. (*Ўзбекистон Республикаси Адлия вазирлиги томонидан 2006 йил 22 мартда 1217-1-сон билан давлат рўйхатидан ўтказилди*)
108. «Автомобиль транспортида йўловчилар ташиш билан шуғулланишга лицензия олишда яқка тартибдаги тадбиркорлар томонидан тўланган давлат божини қайтариш ёки ҳисобга қўшиш тартиби тўғрисида низомни тасдиқлаш ҳақида» Ўзбекистон Республикаси Молия вазирлиги, Ўзбекистон автомобиль ва дарё транспорти агентлигининг 2006 йил 16 мартдаги 32, 3-сон қарори. (*Ўзбекистон Республикаси Адлия вазирлиги томонидан 2006 йил 28 мартда 1555-сон билан давлат рўйхатидан ўтказилди*)

Вазирликлар, давлат қўмиталари ва идораларининг умумий мажбурий тусдаги меъёрий ҳужжатларини давлат рўйхатидан ўтказиш ҳолати тўғрисида 2006 йил 18 мартдан 31 мартгача бўлган маълумот

БИРИНЧИ БЎЛИМ

ЎЗБЕКИСТОН РЕСПУБЛИКАСИНING ҚОНУНИ

100 Тadbиркорлик субъектларини текширишлар сони қисқартирилганлиги ҳамда текширишлар тизими такомиллаштирилганлиги муносабати билан Ўзбекистон Республикасининг айрим қонун ҳужжатларига ўзгартиш ва қўшимчалар киритиш тўғрисида*

Қонунчилик палатаси томонидан
2006 йил 26 январда қабул қилинган

Сенат томонидан 2006 йил 25 февралда маъқулланган

1-модда. Ўзбекистон Республикасининг 1998 йил 30 апрелда қабул қилинган «**Фермер хўжалиги тўғрисида**»ги 602–I-сонли Қонуни (2004 йил 26 августда қабул қилинган 662–II-сонли Ўзбекистон Республикаси Қонуни билан тасдиқланган таҳририда) (Ўзбекистон Республикаси Олий Мажлисининг Ахборотномаси, 2004 йил, № 9, 162-модда) **30-моддасининг матни** қуйидаги таҳрирда баён этилсин:

«Фермер хўжалиги фаолиятини текшириш (молия-хўжалик фаолиятини текширишлар бундан мустасно), давлат эҳтиёжлари учун маҳсулот реализация қилиш шартнома мажбуриятлари бажарилмаган ёки ер тўғрисидаги қонун ҳужжатлари бузилганлигига далиллар бўлган, шунингдек ягона ер солиғи ўз вақтида тўланмаган ҳолларда, ижарага олиш шартномасига мувофиқ ижарага берилган ер участкасидан фақат белгиланган мақсадда ва оқилона фойдаланиш масалалари бўйича, белгиланган тартибда амалга оширилади.

Фермер хўжаликларининг молия-хўжалик фаолиятини режали текширишлар кўпи билан тўрт йилда бир марта амалга оширилади.

Янги ташкил этилган фермер хўжаликларининг молия-хўжалик фаолияти улар давлат рўйхатидан ўтказилган пайтдан эътиборан икки йил мобайнида режали текширувлардан ўтказилиши мумкин эмас».

2-модда. Ўзбекистон Республикасининг 1998 йил 24 декабрда қабул қилинган «**Хўжалик юритувчи субъектлар фаолиятини давлат томонидан назорат қилиш тўғрисида**»ги 717–I-сонли Қонунига (Ўзбекистон Республикаси Олий Мажлисининг Ахборотномаси, 1999 йил, № 1, 8-модда; 2000 йил, № 5-6, 153-модда; 2001 йил, № 1-2, 23-модда; 2004 йил, № 5, 90-модда; 2005 йил, № 1, 18-модда) қуйидаги ўзгартиш ва қўшимчалар киритилсин:

1) **3-модданниг бешинчи хатбошиси** қуйидаги таҳрирда баён этилсин:

«молия-хўжалик фаолиятини текшириш (тафтиш қилиш) — солиқ ва валюта

* Ушбу Қонун «Халқ сўзи» газетасида 2006 йил 24 мартда эълон қилинган.

тўғрисидаги қонун ҳужжатларига риоя этилиши устидан назоратни амалга ошириш мақсадида хўжалик юритувчи субъектларнинг бухгалтерия, молия, статистика, банк ҳамда бошқа ҳужжатларини ўрганиш ва таққослаш»;

2) **9-модда:**

биринчи қисмининг биринчи хатбошисидаги «тафтишдан ўтказиш» деган сўзлар «молия-хўжалик фаолиятини текширишлар» деган сўзлар билан алмаштирилсин;

қуйидаги мазмундаги **учинчи қисм** билан тўлдирилсин:

«Хўжалик юритувчи субъектларнинг молия-хўжалик фаолиятини текширишлар белгиланган тартибда фақат давлат солиқ хизмати органлари томонидан, мазкур органлар текширишлар давомида солиқ ва валютага оид жиноятлар аломатларини аниқлаганида эса Ўзбекистон Республикаси Бош прокуратураси ҳузуридаги Солиқ ва валютага оид жиноятларга қарши курашиш департаменти томонидан амалга оширилади»;

3) **10-модда** қуйидаги тахрирда баён этилсин:

«10-модда. Текширишлар даврийлиги

Хўжалик юритувчи субъектларнинг фаолиятини текширишлар махсус ваколатли органнинг қарорига биноан режали тартибда кўпи билан йилига бир марта амалга оширилиши мумкин, хусусий корхоналар ва ушбу Қонуннинг 10¹-моддасида назарда тутилган ҳоллар бундан мустасно.

Белгиланган нормалар ва қоидаларга ўз вақтида ҳамда тўла ҳажмда риоя этувчи хўжалик юритувчи субъектларнинг фаолиятини текширишлар назорат қилувчи органлар томонидан кўпи билан икки йилда бир марта амалга оширилади, ушбу Қонуннинг 10¹-моддасида назарда тутилган ҳоллар бундан мустасно.

Хусусий корхоналар фаолиятини текширишлар назорат қилувчи органлар томонидан кўпи билан икки йилда бир марта, белгиланган тартибда амалга оширилиши мумкин, қонун ҳужжатларида назарда тутилган ҳоллар бундан мустасно»;

4) Қонун қуйидаги мазмундаги **10¹-модда** билан тўлдирилсин:

«10¹-модда. Тадбиркорлик субъектларининг молия-хўжалик фаолиятини режали текширишлар даврийлиги

Микрофирмалар, кичик корхоналар ва фермер хўжаликларининг молия-хўжалик фаолиятини режали текширишлар кўпи билан тўрт йилда бир марта, бошқа тадбиркорлик субъектларининг молия-хўжалик фаолиятини режали текширишлар кўпи билан уч йилда бир марта амалга оширилади.

Янги ташкил этилган микрофирмалар, кичик корхоналар ва фермер хўжаликларининг молия-хўжалик фаолияти улар давлат рўйхатидан ўтказилган пайтдан эътиборан икки йил мобайнида режали текширувлардан ўтказилиши мумкин эмас»;

5) **14¹-модданинг матни** қуйидаги тахрирда баён этилсин:

«Хўжалик юритувчи субъектлар фаолиятини муқобил текширишлар жиноят ишлари юзасидан тергов олиб бориш жараёнида текшириш тайинлаш тўғрисидаги қарор асосида ёхуд назорат қилувчи органлар томонидан махсус ваколатли органнинг қарорига биноан амалга оширилади. Хўжалик юритувчи субъектлар фаолиятини муқобил текширишлар хўжалик юритувчи субъектларга бормасдан туриб амалга оширилади. Хўжалик юритувчи субъектлар фаолиятини муқобил текширишларга уларнинг текширилаётган хўжалик юритувчи субъект билан ўзаро муносабатлари юзасидангина йўл қўйилади, улардан муқобил текшириш предметига тааллуқли бўлмаган молия-бухгалтерия ҳужжатларини ёки бошқа ҳужжатларни талаб қилиб олиш тақиқланади».

3-модда. Ўзбекистон Республикасининг 2000 йил 25 майда қабул қилинган «Тадбиркорлик фаолияти эркинлигининг кафолатлари тўғрисида»-ги 69-II-сонли Қонунига (Ўзбекистон Республикаси Олий Мажлисининг Ахборотномаси, 2000 йил, № 5-6, 140-модда; 2001 йил, № 5, 89-модда; 2003 йил, № 5, 67-модда; 2004 йил, № 1-2, 18-модда, № 5, 90-модда; 2005 йил, № 1, 18-модда) қуйидаги ўзгартиш ва қўшимчалар киритилсин:

1) **39-моддаси** қуйидаги таҳрирда баён этилсин:

«39-модда. Тадбиркорлик субъектлари фаолиятини текширишларнинг чекланганлиги

Тадбиркорлик субъектларининг фаолиятини текширишлар назорат қилувчи органлар фаолиятини мувофиқлаштириш бўйича махсус ваколатли органнинг қарорига биноан назорат қилувчи органлар томонидан режали тартибда кўпи билан йилига бир марта амалга оширилиши мумкин, хусусий корхоналар ва ушбу модданинг иккинчи—бешинчи қисмларида назарда тутилган ҳоллар бундан мустасно.

Белгиланган нормалар ва қоидаларга ўз вақтида ҳамда тўла ҳажмда риоя қилувчи тадбиркорлик субъектларининг фаолиятини текширишлар назорат қилувчи органлар томонидан кўпи билан икки йилда бир марта амалга оширилади, ушбу моддада назарда тутилган ҳоллар бундан мустасно.

Хусусий корхоналар фаолиятини текширишлар назорат қилувчи органлар томонидан кўпи билан икки йилда бир марта, белгиланган тартибда амалга оширилиши мумкин, қонун ҳужжатларида назарда тутилган ҳоллар бундан мустасно.

Микрофирмалар, кичик корхоналар ва фермер хўжалиқларининг молия-хўжалик фаолиятини режали текширишлар кўпи билан тўрт йилда бир марта, бошқа тадбиркорлик субъектларининг молия-хўжалик фаолиятини режали текширишлар кўпи билан уч йилда бир марта амалга оширилади.

Янги ташкил этилган микрофирмалар, кичик корхоналар ва фермер хўжалиқларининг молия-хўжалик фаолияти улар давлат рўйхатидан ўтказилган пайдан эътиборан икки йил мобайнида режали текширувлардан ўтказилиши мумкин эмас.

Тадбиркорлик субъектларининг фаолиятини текширувлардан ўтказиш муддатлари ўттиз календарь кундан ошмаслиги лозим. Алоҳида ҳолларда бу муддат назорат қилувчи органлар фаолиятини мувофиқлаштириш бўйича махсус ваколатли органнинг қарорига биноан узайтирилиши мумкин.

Ўтказилаётган текширишлар тадбиркорлик субъектларининг фаолият кўрсатишига тўсқинлик қилмаслиги керак.

Ўзбекистон Республикаси Савдо-саноат палатасига аъзо тадбиркорлик субъектларининг фаолиятини текширишлар мазкур Палата вакиллари иштирокида амалга оширилиши мумкин.

Прокуратура, ички ишлар ва миллий хавфсизлик хизмати органлари томонидан тадбиркорлик фаолияти субъектларининг фаолиятини текширувлардан ўтказиш учун кўзғатилган жиноят ишининг мавжудлиги асос бўлади. Бунда тадбиркорлик фаолияти субъектининг кўзғатилган жиноят иши билан боғлиқ фаолиятигина текширув билан қамраб олинishi мумкин бўлиб, бу ҳақда текширув тайинланганлиги тўғрисидаги қарорда кўрсатилган бўлиши керак.

Тадбиркорлик субъектларининг молия-хўжалик фаолиятини текширишлар белгиланган тартибда фақат давлат солиқ хизмати органлари томонидан, мазкур органлар текширишлар давомида солиқ ва валютага оид жиноятлар аломатларини аниқлаганида эса Ўзбекистон Республикаси Бош прокуратураси ҳузуридаги Солиқ ва валютага оид жиноятларга қарши курашиш департаменти томонидан амалга оширилади.

Тадбиркорлик фаолияти субъектлари назорат қилувчи ва ҳуқуқни муҳофаза қилувчи органларнинг ваколатига кирмайдиган масалалар бўйича уларнинг талабларини бажармаслик ҳамда текшириш предметига тааллуқли бўлмаган материаллар билан уларни таништирмаслик ҳуқуқига эга.

Текширишлар натижалари далолатнома (маълумотнома) билан расмийлаштирилади, унинг бир нусхаси текшириляётган тадбиркорлик фаолияти субъектида қолади»;

2) **Қонун** қуйидаги мазмундаги **39¹-модда** билан тўлдирилсин:

«39¹-модда. Тадбиркорлик субъектларига нисбатан молиявий жазо чоралари қўлланилмаслиги

Тадбиркорлик субъектлари назорат органларининг текширишлар натижалари бўйича кўрсатмаларини бажарган, шунингдек зарарнинг ўрнини белгиланган муддатларда ва тўла ҳажмда ихтиёрий равишда қоплаган, шу жумладан пеня тўлаган тақдирда, уларга нисбатан молиявий жазо чоралари қўлланилмайди».

4-модда. Ўзбекистон Республикасининг 2003 йил 11 декабрда қабул қилинган «**Хусусий корхона тўғрисида**»ги 558–II-сонли Қонуни (Ўзбекистон Республикаси Олий Мажлисининг Ахборотномаси, 2004 йил, № 1-2, 8-модда) **25-моддасининг матни** қуйидаги тахрирда баён этилсин:

«Хусусий корхона фаолиятини текширишлар назорат қилувчи органлар томонидан кўпи билан икки йилда бир марта, белгиланган тартибда амалга оширилиши мумкин, қонун ҳужжатларида назарда тутилган ҳоллар бундан мустасно.

Хусусий корхоналарнинг — кичик тадбиркорлик субъектларининг молия-хўжалик фаолиятини режали текширишлар кўпи билан тўрт йилда бир марта, бошқа хусусий корхоналарнинг молия-хўжалик фаолиятини режали текширишлар эса кўпи билан уч йилда бир марта амалга оширилади.

Янги ташкил қилинган хусусий корхоналарнинг — кичик тадбиркорлик субъектларининг молия-хўжалик фаолияти улар давлат рўйхатидан ўтказилган пайтдан эътиборан икки йил мобайнида режали текширувлардан ўтказилиши мумкин эмас».

5-модда. Ушбу Қонун расмий эълон қилинган кундан эътиборан кучга кирди.

Ўзбекистон Республикасининг Президенти И. КАРИМОВ

Тошкент ш.,
2006 йил 23 март,
ЎРҚ–26-сон

ИККИНЧИ БЎЛИМ

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ФАРМОНИ

101 Ўзбекистон Республикаси Президенти ҳузуридаги Судьяларни танлаш ва лавозимларга тавсия этиш бўйича олий малака комиссияси фаолиятини такомиллаштириш тўғрисида

Суд ҳокимияти мустақиллигини кучайтириш, судьялар захирасини шакллантириш, номзодларни танлаш ва лавозимларга тавсия этишнинг демократик тамойилларини мустаҳкамлаш, судьялар корпуси барқарорлигини таъминлаш, Судьяларни танлаш ва лавозимларга тавсия этиш бўйича олий малака комиссияси фаолиятини ташкил қилишни тубдан ўзгартириш мақсадида ҳамда Ўзбекистон Республикасининг «Судлар тўғрисида»ги Қонуни 11-моддасига мувофиқ:

1. Қуйидагилар:

Ўзбекистон Республикаси Президенти ҳузуридаги Судьяларни танлаш ва лавозимларга тавсия этиш бўйича олий малака комиссиясининг ташкилий тузилмаси ва штатлар сони 1 ва 2-иловаларга мувофиқ;

Ўзбекистон Республикаси Президенти ҳузуридаги Судьяларни танлаш ва лавозимларга тавсия этиш бўйича олий малака комиссияси тўғрисида янги таҳрирдаги низом, шунингдек унинг таркиби 3 ва 4*-иловаларга мувофиқ тасдиқлансин.

2. Ўзбекистон Республикаси Вазирлар Маҳкамаси мазкур Фармонни ижро этиш юзасидан икки ҳафта муддатда Комиссияни молиявий ва моддий-техникавий жиҳатдан таъминлаш тўғрисида қарор қабул қилсин.

3. Ўзбекистон Республикаси Адлия вазирлиги тегишли вазирлик ва идоралар билан биргаликда бир ой муддатда қонун ҳужжатларига ушбу Фармондан келиб чиқадиган ўзгартиш ва қўшимчалар тўғрисида Вазирлар Маҳкамасига таклифлар киритсин.

4. Қуйидагилар ўз кучини йўқотган деб ҳисоблансин:

«Ўзбекистон Республикаси Президенти ҳузуридаги Судьяларни танлаш ва лавозимларга тавсия этиш бўйича олий малака комиссияси тўғрисида» Ўзбекистон Республикаси Президентининг 2001 йил 19 мартдаги ПФ–2817-сон Фармони;

«Ўзбекистон Республикаси Президенти ҳузуридаги Судьяларни танлаш ва лавозимларга тавсия этиш бўйича олий малака комиссияси тўғрисида» Ўзбекистон Республикаси Президентининг 2001 йил 24 сентябрдаги ПФ–2943-сон Фармони;

«Ўзбекистон Республикаси Президентининг баъзи фармонларига ўзгартиш ва қўшимчалар киритиш тўғрисида» Ўзбекистон Республикаси Президентининг 2005 йил 25 мартдаги ПФ–3587-сон Фармони иловасининг 2-банди.

* 4-илова берилмайди.

5. Ушбу Фармоннинг ижросини назорат қилиш Ўзбекистон Республикаси Президенти Давлат маслаҳатчисининг ўринбосари А. Набиев зиммасига юклансин.

Ўзбекистон Республикаси Президенти И. КАРИМОВ

Тошкент ш.,
2006 йил 17 март,
ПФ-3725-сон


—

+

+

Ўзбекистон Республикаси
Президентининг 2006 йил 17 мартдаги
ПФ-3725-сон Фармониغا
1-ИЛОВА

**Ўзбекистон Республикаси Президенти ҳузуридаги Судьяларни
танлаш ва лавозимларга тавсия этиш бўйича олий малака
комиссиясининг ташкилий тузилмаси**



Ўзбекистон Республикаси
Президентининг 2006 йил 17 мартдаги
ПФ–3725-сон Фармонига
2-ИЛОВА

**Ўзбекистон Республикаси Президенти ҳузуридаги Судьяларни
танлаш ва лавозимларга тавсия этиш бўйича олий малака
комиссиясининг штатлар сони**

ОЛИЙ МАЛАКА КОМИССИЯСИНИНГ ТАРКИБИ

1.	Комиссия раиси (жамоатчилик асосида)	— 1
2.	Комиссия раиси ўринбосари (доимий асосда)	— 1
3.	Комиссия аъзолари (жамоатчилик асосида)	— 11
4.	Комиссия аъзолари (доимий асосда)	— 4
Комиссия бўйича жами		— 17

ИЖРОИЯ АППАРАТИ

	I. Комиссия раисининг ўринбосари	— 1
	II. Комиссия ҳузуридаги Суд инспекцияси	
1.	Инспекция раҳбари — комиссия аъзоси	— 1
2.	Инспекция раҳбарининг ўринбосари — комиссия аъзоси	— 1
3.	Етакчи инспектор	— 4
4.	Иш юритувчи	— 1
Жами		— 7
	III. Комиссия Котибияти	
1.	Котибият раҳбари — комиссия аъзоси	— 1
2.	Котибият раҳбарининг ўринбосари — комиссия аъзоси	— 1
3.	Етакчи инспектор	— 4
4.	Архив мудирлари — иш юритувчи	— 1
Жами		— 7
	IV. Хўжалик бўлими	
1.	Бухгалтер	— 1
2.	Хизмат кўрсатувчи ходимлар	— 2
Жами		— 3
Ижроия аппарати бўйича жами		18

Ўзбекистон Республикаси
Президентининг 2006 йил 17 мартдаги
ПФ–3725-сон Фармониغا
3-ИЛОВА

**Ўзбекистон Республикаси Президенти ҳузуридаги Судьяларни
танлаш ва лавозимларга тавсия этиш бўйича олий малака
комиссияси тўғрисида
НИЗОМ**

I. Умумий қоидалар

1. Ушбу Низом Ўзбекистон Республикаси Президенти ҳузуридаги Судьяларни танлаш ва лавозимларга тавсия этиш бўйича олий малака комиссияси (бундан бундан матнда Комиссия деб юритилади) фаолиятини тартибга солади.

2. Комиссия суд ҳокимиятининг чинакам мустақиллигини таъминлаш сиёсатини, суд кадрларини танлаш ва жой-жойига қўйиш тамойилларини янада демократлаштиришни амалга оширадиган Ўзбекистон Республикаси Президенти ҳузуридаги доимий ишловчи орган ҳисобланади.

3. Комиссия зиммасига судлар фаолиятини ташкилий жиҳатдан таъминлаш, Ўзбекистон Республикаси Олий суди, Ўзбекистон Республикаси Олий ҳўжалик суди, фуқаролик ва жиноят ишлари бўйича Қорақалпоғистон Республикаси Олий судлари, фуқаролик ва жиноят ишлари бўйича вилоятлар ва Тошкент шаҳар, туманлараро, туман (шаҳар) судлари, ҳарбий судлар, Қорақалпоғистон Республикаси ҳўжалик суди, вилоятлар ва Тошкент шаҳар ҳўжалик судлари судьяларини танлаш ва лавозимларга тавсия этиш вазифалари юкланади.

4. Комиссия ўз фаолиятини Ўзбекистон Республикаси Конституцияси ва қонунлари, Ўзбекистон Республикаси Олий Мажлиси палаталарининг қарорлари, Ўзбекистон Республикаси Президентининг кадрлар сиёсатини рўёбга чиқаришга қаратилган фармон, қарор ва фармойишлари ҳамда мазкур Низом асосида судьяларнинг мустақиллиги ва уларнинг фақат қонунга бўйсунуши тамойилларига қатъий риоя этган ҳолда амалга оширади.

II. Комиссиянинг асосий вазифалари

5. Комиссиянинг асосий вазифалари қўйидагилардан иборат:
судьяларни танлаш ва жой-жойига қўйишнинг демократик асосларини такомиллаштириш чора-тадбирларини ишлаб чиқиш ва амалга ошириш;

судья кадрларни танлаш ва Ўзбекистон Республикаси Президентининг тасдиғига тақдим этишда қонунийликни таъминлаш;

судьялар мустақиллиги ва уларнинг ижтимоий муҳофазасини мустаҳкамлашга қаратилган чора-тадбирларни амалга ошириш;

судьялик лавозимларига кадрларни танлаш ва жой-жойига қўйиш борасидаги ишларни яхшилаш ҳамда судья кадрларни тарбиялаш бўйича таклифлар ишлаб чиқиш;

судьяликка номзодларни танлаб олишнинг ҳуқуқий негизини такомиллаштириш, уларнинг касб маҳоратини ошириш юзасидан таклифлар ишлаб чиқиш;

судья кадрларни танлаш ва жой-жойига қўйиш бўйича ишларнинг очиқ-ойдинлиги ва ошкоралигини, бу ишнинг вертикал бўйича ҳисобот берилишини таъминлаш, шунингдек бу соҳада хизмат мавқеини суиистеъмом қилиш ҳолатларининг олдини олиш;

Ўзбекистон Республикаси Қонун ҳужжатлари тўплами, 2006 й.

судьялар захирасини шакллантириш, уларни танлаш ва номзодларни лавозимларга тақдим этиш масалалари бўйича судьяларнинг малака ҳайъатлари фаолияти устидан назоратни амалга ошириш;

судлар фаолиятини ташкилий ва ахборот-таҳлилий жиҳатдан таъминлаш;

судьяларни танлаш ва тайинлаш борасида илғор хорижий тажрибаларни ўрганиш ва Комиссиянинг иш амалиётига татбиқ этиш.

III. Комиссиянинг ваколатлари

6. Қўйилган вазифаларни бажариш учун Комиссияга қўйидаги ваколатлар берилади:

тақдим этилган номзодларнинг Ўзбекистон Республикаси Олий суди, Ўзбекистон Республикаси Олий ҳўжалик суди, фуқаролик ва жиноят ишлари бўйича Қорақалпоғистон Республикаси Олий судлари, фуқаролик ва жиноят ишлари бўйича вилоятлар ва Тошкент шаҳар, туманлараро, туман (шаҳар) судлари, ҳарбий судлар, Қорақалпоғистон Республикаси ҳўжалик суди, вилоятлар ва Тошкент шаҳар ҳўжалик судлари судьяси лавозимларига муносиблигини аниқлайди ҳамда мазкур масала бўйича хулосалар беради.

фуқаролик ва жиноят ишлари бўйича вилоятлар, Тошкент шаҳар, туманлараро, туман (шаҳар) судлари, ҳарбий судлар, вилоятлар ва Тошкент шаҳар ҳўжалик судлари судьялари лавозимларига тавсия этиладиган номзодлар бўйича Ўзбекистон Республикаси Президентига тақдимномалар киритади;

фуқаролик ва жиноят ишлари бўйича вилоятлар, Тошкент шаҳар, туманлараро, туман (шаҳар) судлари, ҳарбий судлар, вилоятлар ва Тошкент шаҳар ҳўжалик судлари судьялари ваколатларини муддатидан олдин тугатиш тўғрисида Ўзбекистон Республикаси Президентига тақдимномалар киритади;

Ўзбекистон Республикаси Олий суди, Олий ҳўжалик суди, фуқаролик ва жиноят ишлари бўйича Қорақалпоғистон Республикаси судлари, Қорақалпоғистон Республикаси ҳўжалик суди судьяларининг ваколатларини муддатидан олдин тугатиш тўғрисидаги тақдимномаларни (материалларни) кўриб чиқади ва улар юзасидан хулосалар беради;

судья кадрларнинг захирасини шакллантириш ва ундан самарали фойдаланиш борасидаги ишларнинг ташкил этилишини таъминлайди;

номзодларни ўрганишнинг турли усулларида фойдаланади (суҳбатлашиш, мустақил экспертлар томонидан синаб кўриш, топширилган муаммо бўйича мавзуга оид рефератлар тайёрлаш, тезкор савол-жавоблар ўтказиш ва ҳоказолар);

судья кадрлар билан ишлашдаги камчиликлар хусусида тақдимномалар, уни такомиллаштириш бўйича таклифлар киритади;

судьялар малака ҳайъатларининг фаолиятини такомиллаштириш юзасидан тавсиялар беради;

Комиссия зиммасига юклатилган вазифаларни амалга ошириш чоғида Ўзбекистон Республикаси Олий суди, Олий ҳўжалик суди, Судьялар уюшмаси, ҳуқуқни муҳофаза қилиш органлари, бошқа муассасалар ва ташкилотлар, жамоат бирлашмалари билан ҳамкорлик қилади.

7. Комиссия ўз зиммасига юклатилган вазифаларни амалга ошириш чоғида судьяларнинг малака ҳайъатлари билан ҳамкорлик қилади:

судьяларнинг малака ҳайъатлари томонидан тақдим этилган номзодлар захирасини шакллантириш, уларни танлаб олиш ва номзодларни судьялик лавозимларига тавсия этиш масаласини ҳал қилиш учун зарур бўлган материалларни (аризалар,

билдирилган фикрлар, хулосалар, маълумотномалар ва бошқа ҳужжатларни) кўриб чиқади;

судьялар захирасини шакллантириш, танлаб олиш ва лавозимларга тавсия этиш масалалари бўйича судьяларнинг малака ҳайъатлари фаолиятини вақти-вақти билан ўрганади.

судья кадрлар билан ишлаш тўғрисида судьялар малака ҳайъатлари раисларининг ҳисоботини мунтазам равишда тинглаб боради ва судьяларнинг тегишли малака ҳайъатлари фаолиятини такомиллаштириш бўйича тавсиялар беради;

судьяларнинг малака ҳайъатларидан судьялик лавозимларига бўш ўринлар мавжудлиги ҳақидаги, судья кадрларнинг захираси қандай шакллантирилаётгани тўғрисидаги ахборотни, Комиссия олдида турган вазифаларни ҳал этиш учун зарур бўлган бошқа ахборотни талаб қилиб олади;

судьяларнинг малака ҳайъатларига судья кадрларни тайёрлаш ва уларнинг малакасини ошириш, ушбу соҳада халқаро тажрибани ўрганиш ва ундан фойдаланиш борасидаги ишларни ташкил қилиш билан боғлиқ бошқа топшириқларни беради.

IV. Судьялар захирасини шакллантириш ва судьялик лавозимига номзодларни танлаш тартиби

8. Захирани шакллантириш ва судьялик лавозимларига тақдим этиш учун номзодларни танлаш бўйича ишлар судьяларнинг малака ҳайъатлари томонидан амалга оширилади.

мазкур банднинг учинчи хатбошида кўрсатилган лавозимлардан ташқари, фуқаролик ва жиноят ишлари бўйича туманлараро, туман (шаҳар) судлари, фуқаролик ва жиноят ишлари бўйича Қорақалпоғистон Республикаси олий судлари, фуқаролик ва жиноят ишлари бўйича вилоятлар ва Тошкент шаҳар судлари, ҳарбий судлар судьялигига номзодларнинг захирасини шакллантириш судьяларнинг тегишли малака ҳайъатлари томонидан амалга оширилади.

Ўзбекистон Республикаси Олий суди судьялигига, фуқаролик ва жиноят ишлари бўйича Қорақалпоғистон Республикаси олий судларининг, фуқаролик ва жиноят ишлари бўйича вилоятлар ва Тошкент шаҳар судларининг, Ўзбекистон Республикаси Ҳарбий судининг раиси ва раис ўринбосарлари лавозимига номзодлар захирасини шакллантириш Олий малака ҳайъати томонидан амалга оширилади.

Ўзбекистон Республикаси Олий хўжалик суди, Қорақалпоғистон Республикаси хўжалик суди, вилоятлар ва Тошкент шаҳар хўжалик судларининг судьялигига номзодлар захирасини шакллантириш Хўжалик судлари судьяларининг малака ҳайъати томонидан амалга оширилади.

9. Умумий юрисдикция судларининг малака ҳайъатларига тегишлича фуқаролик ва жиноят ишлари бўйича Қорақалпоғистон Республикаси олий судлари, фуқаролик ва жиноят ишлари бўйича вилоятлар, Тошкент шаҳар судлари, Ўзбекистон Республикаси Ҳарбий суди раислари раҳбарлик қиладилар.

Хўжалик судлари судьяларининг малака ҳайъати раиси Олий хўжалик суди, Қорақалпоғистон Республикаси хўжалик суди, вилоятлар ва Тошкент шаҳар хўжалик судлари судьялари орасидан сайланади.

Умумий юрисдикция судларининг олий малака ҳайъати раиси Ўзбекистон Республикаси Олий суди Пленуми томонидан Ўзбекистон Республикаси Олий суди судьялари орасидан сайланади.

10. Фуқаролик ва жиноят ишлари бўйича туманлараро, туман (шаҳар) судлари, округ ва ҳудудий ҳарбий судлар, Қорақалпоғистон Республикаси хўжалик суди,

вилоятлар ва Тошкент шаҳар хўжалик судларининг судьялигига (хўжалик судлари раислари ва раис ўринбосарлари бундан мустасно) номзодларнинг захирасини шакллантириш учун судьяларнинг тегишли малака ҳайъатлари ўзларини захирага кириштириш ёки судьяларнинг аниқ бўш лавозимларини эгаллаш истагини билдирган шахслардан аризаларни қабул қиладилар. Аризага кадрларни ҳисобга олиш шахсий варағи, таржимаи ҳол, олий юридик маълумот тўғрисидаги диплом нусхаси, меҳнат дафтарчасидан кўчирма, охириги иш жойидан тавсифнома илова қилинади. Ўзбекистон Республикасининг йигирма беш ёшдан кичик бўлмаган, олий юридик маълумотли, мутахассислиги бўйича иш стажига камида уч йил бўлган фуқаролари судьяликка номзодлар захирасига киритилишлари мумкин. Судланган шахслар судьяликка номзодлар захирасига қабул қилинишлари мумкин эмас.

Бошқа судьялик лавозимларига захирани шакллантириш белгиланган тартибда тегишли малака ҳайъатлари томонидан амалга оширилади.

11. Ушбу Низомнинг 10-банди талабларига риоя этилган тақдирда, аризалар қабул қилинишини рад этишга йўл қўйилмайди.

Аризани қабул қилишни рад этиш хусусида Комиссияга шикоят қилиниши мумкин.

12. Аризаларни қабул қилиш ва рўйхатга олиш, ҳужжатларнинг тўлиқлиги ва тўғрилигини текшириш ишларини судьялар малака ҳайъатининг масъул котиби амалга оширади.

13. Судьяларнинг малака ҳайъатлари номзодларнинг касбий, ахлоқий ва ишчанлик фазилатларини ўрганиб чиқишни ташкил этадилар ҳамда ҳужжатлар келиб тушган пайтдан бошлаб кечи билан икки ой муддатда малака имтиҳонларини ўтказадилар, шу имтиҳонларнинг натижалари бўйича уларни судьяликка номзодлар захирасига киритиш ёки киритишни рад этиш тўғрисида қарор чиқарадилар.

Судьяларнинг малака ҳайъатлари энг яхши тайёргарлик кўрган, юқори малакали юристлар — судлар, ҳуқуқни муҳофаза қилиш органлари, муассасалар ва ташкилотларнинг ходимларини номзодлар захирасига киритадилар.

Малака ҳайъатларининг мажлисларида тегишлича фуқаролик ва жиноят ишлари бўйича Қорақалпоғистон Республикаси олий судларининг, фуқаролик ва жиноят ишлари бўйича вилоятлар ва Тошкент шаҳар, туманлараро, туман (шаҳар) судларининг, ҳарбий судларнинг, Қорақалпоғистон Республикаси хўжалик суди, вилоятлар ва Тошкент шаҳар хўжалик судларининг судьялари иштирок этишлари мумкин, улар судьялик лавозимига ҳар бир номзод бўйича ўз фикрини билдиришга, малака ҳайъатининг қарорига қўшилмаган тақдирда эса ўз фикрини ёзма равишда Комиссияга юборишга ҳақлидирлар.

Захирага киритилган шахслар хусусидаги маълумотлар Судьяларнинг тегишли малака ҳайъатлари томонидан Комиссияга йўлланади.

14. Судьяларнинг малака ҳайъатлари захирада бўлган ва илк бор фуқаролик ва жиноят ишлари бўйича туманлараро, туман (шаҳар) судлари, округ ва ҳудудий ҳарбий судлар, Қорақалпоғистон Республикаси хўжалик суди ҳамда вилоятлар ва Тошкент шаҳар хўжалик судларининг судьяси лавозимларига тақдим этилаётган шахсларни Ўзбекистон Республикаси Адлия вазирлиги ҳузуридаги Юристлар малакасини ошириш марказида махсус курсларда ўқитишни ташкил этади. Мазкур махсус курсларни тамомлаганлиги тўғрисидаги сертификат, у берилган кундан бошлаб уч йил мобайнида амал қилади.

15. Судьялик лавозими бўшаб қолган тақдирда Судьяларнинг тегишли малака ҳайъати судьялик лавозимига захирада турган шахсларни хабардор қилади. Шу билан бирга 14-бандда назарда тутилган судьялик лавозимига илк бор тақдим этилаётган

номзодлар Ўзбекистон Республикаси Адлия вазирлиги ҳузуридаги Юристлар малакасини ошириш маркази махсус курсларини тугатганлиги тўғрисидаги сертификатга эга бўлган тақдирдагина хабардор қилинади.

Бўшаб қолган судьялик лавозимини эгаллаш учун танлаб олишда иштирок этиш истагини билдирган шахслар малака имтиҳонини топширадилар, ана шу имтиҳон натижалари бўйича судьяларнинг малака ҳайъати уларнинг судьялик лавозимига муносиб ёки муносиб эмаслиги тўғрисида қарор қабул қилади.

16. Судьяларнинг малака ҳайъати бўш судьялик лавозимига тавсия этилган камида икки номзодга доир ҳужжатларни Комиссияга йўллади.

17. Ваколат муддатлари тугаётган судьяларни янги муддатга тақдим этиш тўғрисидаги масала судьяларнинг тегишли малака ҳайъатлари томонидан кўриб чиқилади. Судьялар малака ҳайъатининг мазкур шахслар лавозимга муносиблиги ёки муносиб эмаслиги тўғрисидаги ҳамда уларни янги муддатга тайинлаш мумкинлиги ҳақидаги қарори ваколат муддати тугашига камида уч ой қолганда Комиссияга юборилади.

Комиссия судьяларнинг ваколат муддати тугашидан камида бир ой олдин уларни янги муддатга тақдим этиш тўғрисидаги ҳужжатларни кўриб чиқилишини таъминлайди.

18. Судьялар малака ҳайъатларининг раислари Комиссияга тақдим этиладиган судья кадрларга оид ҳужжатларнинг тўлиқлиги ва сифати учун шахсан жавобгар бўладилар.

Комиссия мунтазам равишда судьялар малака ҳайъатлари раисларининг судья кадрлар билан ишлаш аҳволи тўғрисидаги ҳисоботини тинглаб боради. Судья кадрлари захирасини шакллантириш ва танлаш чоғида малака ҳайъатларининг фаолиятида таниш-билишчилик, маҳаллийчилик, хизмат мавқеини суиистеъмол қилиш каби ҳамда бошқа қонунбузарлик ҳолатлари аниқланган тақдирда Комиссия тегишли малака ҳайъатининг раисини эгаллаб турган лавозимидан озод этишгача бўлган даражада интизомий жавобгарликка тортиш тўғрисида тақдимнома киритишга ҳақли.

V. Комиссия ишини ташкил қилиш

19. Комиссия Ўзбекистон Республикаси Олий Мажлиси Сенати ва Қонунчилик палатаси, Олий суди, Олий ҳўжалик суди, Адлия вазирлиги, Ички ишлар вазирлиги, Бош прокуратура вакиллари ва ҳуқуқ соҳасидаги юқори малакали мутахассислар, шунингдек жамоатчилик вакилларидан шакллантирилади.

20. Комиссия таркиби Ўзбекистон Республикаси Президентининг Фармони билан ўн етти кишидан иборат таркибда тузилади ҳамда Комиссия раиси, раис ўринбосари ва аъзолардан ташкил топади.

Комиссия раиси ва унинг ўн бир нафар аъзоси беш йил муддатга тасдиқланади ва ўз фаолиятларини жамоатчилик асосида амалга оширадилар.

Комиссия раисининг ўринбосари ва тўрт нафар аъзоси ўз фаолиятларини доимий асосда амалга оширадилар

21. Комиссия раиси Комиссиянинг фаолиятига раҳбарликни амалга оширади ва Комиссия зиммасига юкланган вазифаларнинг бажарилиши учун шахсан жавобгардир.

Комиссия раиси:

Комиссия фаолиятига умумий раҳбарликни амалга оширади;

Комиссия мажлисларини чақиради ва унга раислик қилади;

Комиссия ваколатига тегишли бўлган масалаларни кўриб чиқиш учун киритади;

Комиссиянинг ижроия аппарати ходимлари ўртасида вазифаларни тақсимлайди;

Комиссия раиси бўлмаган пайтларда унинг вазифасини ўринбосари амалга оширади.

22. Комиссия раисининг ўринбосари:

Комиссиянинг ижроия аппарати фаолиятида, шунингдек унинг молиявий-хўжалик фаолиятида ташкилий раҳбарликни амалга оширади;

Комиссия раиси бўлмаганда Комиссия мажлисларига раислик қилади;

Комиссия қарорлари бажарилишини назорат қилиш ишларини ташкил этади; доимий асосда фаолият юритувчи Комиссия аъзоларидан ташқари, Комиссия ижроия аппарати ходимларини Комиссия қарорига асосан лавозимларга тайинлайди ва озод этади;

Комиссия штатлар жадвалини тасдиқлайди;

бўйруқ ва фармойишлар чиқаради;

фуқароларни қабул қилади ҳамда шикоят ва аризаларни кўриб чиқиш ишларини ташкил этади;

қонун ҳужжатлари ва Комиссия қарорларига мувофиқ бошқа ваколатларни амалга оширади.

23. Комиссия фаолияти Комиссия аъзоларининг коллегиялиги ва тенг ҳуқуқчилиги, Комиссия ваколатига кирувчи масалаларнинг ҳар томонлама, тўлиқ ва холисона ҳал этилишини таъминлаш тамойилларига асосланади.

24. Комиссия қонунга асосан кадрларни судьялик лавозимларига тайинлашга тавсиянома тайёрловчи охириги босқич ҳисобланади.

25. Комиссия судья кадрлар захирасини шакллантириш ва ундан самарали фойдаланиш борасида судьялар малака ҳайъатларининг фаолияти назорат қилиниши ва мувофиқлаштирилишини таъминлайди.

Комиссия вақти-вақти билан жойларга чиқиб судьялар малака ҳайъатлари томонидан кадрлар захирасини шакллантириш ва танлаш бўйича ишларнинг ахволини текшириб туради.

26. Комиссия мажлислари унинг ваколатига кирувчи масалаларнинг тайёрланишига қараб, одатда бир ойда камида икки марта ўтказилади.

Комиссия аъзоларининг кўпчилиги иштирок этган тақдирда комиссиянинг мажлиси ваколатли, деб ҳисобланади.

Судьялик лавозимларига номзодларни танлаш ва тавсия этиш масалалари Комиссия мажлисларида кўриб чиқиладиганда номзодни тақдим этаётган тегишли судьялар малака ҳайъатининг раиси маслаҳат овози билан қатнашиши мажбурийдир.

Комиссия мажлисининг баённомаси Комиссия котибияти ходими томонидан юритилади ва Комиссия раиси томонидан имзоланади.

27. Судьялик лавозимларига кадрлар бўйича таклифлар Комиссия томонидан кўриб чиқиш учун бўш судьялик лавозимига камида икки номзоддан иборат ҳолда муқобиллик асосида киритилади.

Комиссия мажлисида муҳокама этиладиган номзоднинг шахсий ва касбий сифатлари тўғрисида доимий асосда фаолият юритувчи Комиссия аъзосининг ахбороти тингланади.

Комиссия судья кадрлар бўйича тақдим этилган материалларни ўрганиш ва суҳбатлашиш йўли билан судьяликка номзодларни танлаб олади, уларнинг касб маҳорати даражасини, маънавий фазилатларини (ҳалоллиги ва виждонини сотмаслигини), қобилиятини, шунингдек ҳуқуқ соҳасидаги тегишли тайёргарлиги ва малакасини аниқлайди.

Судья кадрларни танлаш ва тавсия этиш бўйича Комиссия фаолиятини ташкил қилиш регламент билан белгиланади.

28. Қарор мажлисда иштирок этаётган Комиссия аъзоларининг оддий кўпчи-

лик овози билан қабул қилинади. Номзодга овоз бериш чоғида Комиссия аъзоларидан бошқа шахсларнинг ҳозир бўлишига йўл қўйилмайди.

Комиссия мажлисида қуйидаги қарорлар қабул қилиниши мумкин:

номзоднинг тақдим этилган судьялик лавозимига муносиблиги тўғрисида;

номзоднинг тақдим этилган судьялик лавозимига номуносиблиги тўғрисида;

номзоднинг кейинчалик бўш лавозимга тақдим этиш ҳуқуқи билан судьялик лавозими захирасида қолдирилиши тўғрисида;

судьялик лавозимига тақдим этилган номзоднинг ҳужжатларини профессионал, ахлоқий ва шахсий фазилатларини қўшимча ўрганиш учун қайтариб юбориш тўғрисида.

Комиссиянинг қарори хулоса тарзида расмийлаштирилади ва мажлисда қатнашган Комиссия аъзолари томонидан имзоланади. Овоз бериш вақтида озчиликни ташкил қилган Комиссия аъзолари хулосани имзолайдилар, уларнинг алоҳида фикри мажлис баённомасига киритилади.

29. Номзодларнинг Ўзбекистон Республикаси Олий суди, Олий ҳўжалик суди, Қорақалпоғистон Республикаси судларининг судьялари лавозимларига муносиблиги тўғрисида Комиссиянинг хулосаси Ўзбекистон Республикаси Президентига кўриб чиқиш учун киритилади.

Қорақалпоғистон Республикаси судлари судьяларини сайлаш ёки тайинлаш учун Комиссия хулосасига асосан Қорақалпоғистон Республикаси Жўқорғи Кенгеси Раиси Ўзбекистон Республикаси Президенти билан келишилган ҳолда, Қорақалпоғистон Республикаси Жўқорғи Кенгесига тақдимнома киритади.

Фуқаролик ва жиноят ишлари бўйича вилоятлар, Тошкент шаҳар судлари, туманлараро, туман (шаҳар) судлари, ҳарбий судлар, вилоятлар ва Тошкент шаҳар ҳўжалик судларининг судьялари лавозимига номзодлар хусусида Комиссия ўз хулосасига асосланиб, уларни тайинлаш тўғрисида Ўзбекистон Республикаси Президентига тақдимнома киритади.

30. Агар Комиссия номзодни судьялик лавозимига номуносиб ёки унинг ҳужжатларини қўшимча ўрганиш учун қайтариб юбориш лозим деган хулосага келган ҳолларда бир йил муддат ўтгандан кейин ушбу масаланинг такроран кўриб чиқишига йўл қўйилади. Бу ҳақда хулосага тегишли ёзув киритилади.

31. Комиссиянинг хулосасида Комиссиянинг номи, таркиби ва мажлиснинг вақти, масаласи кўриб чиқиладиган шахснинг фамилияси, исми ва отасининг исми ҳамда уни таърифловчи бошқа маълумотлар, тақдимномани (материалларни) киритган органнинг номи, шунингдек Комиссия томонидан қабул қилинган қарор кўрсатилади.

32. Материаллар тўлиқ бўлмаган ҳолларда, масалани холисона ечиш мақсадида Комиссия уни кўриб чиқишни кейинга қолдириш ҳуқуқига эгадир.

VI. Комиссиянинг ижроия аппарати

А. Комиссия Котибияти

33. Комиссия Котибияти Комиссия фаолиятини ташкилий ва моддий-техникавий жиҳатдан таъминлаш мақсадида тузилади ҳамда ўз фаолиятида Комиссияга ҳисобот беради.

34. Комиссия Котибияти:

судьяларнинг малака хайъатлари томонидан келиб тушадиган таклифларни ҳамда судья кадрлар захирасига киритилган, шунингдек аниқ лавозимга тавсия этилган ҳар бир номзодга оид ҳужжатларни йиғиш, умумлаштириш ва таҳлил қилиш ишларини амалга оширади;

судья кадрлар бўйича статистик, шахсий ҳисобни ва архив ишини юритади; келиб тушган ҳужжатларнинг тўлиқлиги ва тўғрилигини текширади ҳамда уларни кўриб чиқиш учун Комиссияга топширади;

Комиссияни зарур ахборот-таҳлилий ҳужжатлар билан таъминлайди;

Комиссия топшириғига асосан, судьялар захирасини шакллантириш, уларни танлаш ва лавозимларига тавсия этиш масалалари бўйича судьяларнинг малака хайъатлари фаолиятини ўрганади;

Комиссиянинг бошқа топшириқларини бажаради.

35. Комиссия Котибияти ўз фаолиятини Комиссия томонидан тасдиқланадиган низом асосида олиб боради.

36. Комиссия Котибияти Комиссияга аъзо бўлган раҳбар ва раҳбар ўринбосари, шунингдек тўрт нафар етакчи инспектордан иборатдир.

Комиссия Котибияти раҳбари ва раҳбар ўринбосари ўз лавозимларига Ўзбекистон Республикаси Президенти томонидан тайинланади ва озод этилади.

Комиссия Котибияти олий юридик маълумоти бўлган ва қоида тарикасида судларда иш стажи уч йилдан кам бўлмаган ходимлардан шакллантирилади.

Б. Суд инспекцияси

37. Судларни ҳалол ва малакали кадрлар билан таъминлаш, судьяларни касб бурчи ва хизмат одоб-ахлоқ меъёрларига риоя қилишларини таъминлаш мақсадида Комиссия ҳузурида суд инспекцияси тузилади.

Суд инспекцияси ўз фаолиятида Комиссияга ҳисобот беради.

38. Суд инспекциясининг асосий вазифалари қуйидагилардан иборат:

судьяларнинг қасамёдга риоя этиш ҳолатини таҳлил қилиш;

судьялик одоб-ахлоқи бузилишининг олдини олиш;

судьяларнинг ноқонуний ҳаракати устидан шикоятларни ўрганиш;

судьяларни уларнинг мақоми, шаъни ва кадр-қимматига тажовузлардан ҳимоя қилиш;

судьялик лавозимиغا илк бор кўрсатилаётган номзодларга тааллуқли материалларни тегишли органлар билан биргаликда ўрганиш;

янги ваколат муддатига тақдим этилаётган судьялар номзоди бўйича хулосалар бериш;

судьялар корпуси барқарорлигини таъминлашга, судьяларни лавозимга сайлаш, тайинлаш ва озод этиш бўйича қонунда белгиланган тартибни амалга оширишга кўмаклашиш;

қонун бузилишига йўл қўйган судьяларга нисбатан тегишли чораларни қўллаш тўғрисида Комиссияга таклифлар киритиш.

39. Суд инспекцияси ўз фаолиятини Комиссия томонидан тасдиқланадиган низом асосида олиб боради.

40. Суд инспекцияси Комиссияга аъзо бўлган раҳбар ва раҳбар ўринбосари, шунингдек тўрт нафар етакчи инспектордан иборатдир.

Суд инспекцияси раҳбари ва раҳбар ўринбосари ўз лавозимларига Ўзбекистон Республикаси Президенти томонидан тайинланади ва озод этилади.

Суд инспекцияси олий юридик маълумоти бўлган ва қоида тарикасида судларда иш стажи беш йилдан кам бўлмаган ходимлардан шакллантирилади.

41. Суд инспекцияси ходимлари ўз вазифаларини бажаришда судьяларнинг шаънини ва кадр-қимматини ҳурмат қилишлари, касбга оид сирни сақлашлари шарт.

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ҚАРОРИ

102 Қишлоқ хўжалиги ишлаб чиқаришини давлат томонидан янада қўллаб-қувватлаш чора-тадбирлари тўғрисида

Қишлоқ хўжалиги маҳсулотлари ишлаб чиқаришга сарфланадиган харажатларни камайтириш ҳамда фермер ва ширкат хўжалиklarини давлат томонидан қўллаб-қувватлаш мақсадида:

1. «Ўзагромашсервис» уюшмаси корхоналари ва муқобил машина-трактор парклари истисно тариқасида:

2006-2007 йиллар мобайнида Ҳукумат қарори билан олиб келинадиган қишлоқ хўжалиги техникаси, бутловчи ва эҳтиёт қисмлар, қишлоқ хўжалик шиналари ва таъмирлаш материалларини импорт қилишда божхона тўловларини тўлашдан (божхона расмийлаштируви йиғимларидан ташқари), шунингдек, уларни қишлоқ хўжалиги ишлаб чиқарувчилари ва машина-трактор парклари, жумладан муқобил машина-трактор паркларига сотишда қўшилган қиймат солиғидан;

қишлоқ хўжалиги корхоналари талабномаларига кўра бажариладиган иш ва хизматлар учун қўшилган қиймат солиғи тўлашдан 2007 йилнинг 1 январигача озод этилсин.

2. «Ўзагромашсервис» уюшмаси ва муқобил машина-трактор парклари фермер хўжаликларга қишлоқ хўжалиги техникаси ва моддий-техника ресурсларини сотишда улар қийматининг 5 фоизидан ошмайдиган (солиқлар ва бюджетга тўланадиган мажбурий тўловлардан ташқари) устама нархни назарда тутсин.

3. Мазкур қарорнинг ижросини назорат қилиш Ўзбекистон Республикаси Бош вазири Ш.М. Мирзиёев зиммасига юклансин.

Ўзбекистон Республикаси Президенти И. КАРИМОВ

Тошкент ш.,
2006 йил 17 март,
ПҚ-304-сон

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ҚАРОРИ

103 Халқаро шартномаларни тасдиқлаш тўғрисида

1. Қуйидагилар тасдиқлансин:

Мустақил Давлатлар Ҳамдўстлигига аъзо давлатларнинг 2005 йил 26 августда Қозон шаҳрида имзоланган гуманитар ҳамкорлик ҳақидаги Битими;

Мустақил Давлатлар Ҳамдўстлигига аъзо давлатларнинг 2005 йил 26 августда Қозон шаҳрида имзоланган келишилган чегара сиёсати Концепцияси тўғрисидаги қарори;

Ўзбекистон Республикаси Қонун ҳужжатлари тўплами, 2006 й.

Мустақил Давлатлар Ҳамдўстлигига аъзо давлатларнинг 2005 йил 26 августда Қозон шаҳрида имзоланган терроризм ва экстремизмнинг бошқа зўравонлик кўринишларига қарши курашда ҳамкорлик қилиш Концепцияси ҳақидаги қарори;

Мустақил Давлатлар Ҳамдўстлигига аъзо давлатларнинг 2005 йил 26 августда Қозон шаҳрида имзоланган 2005—2007 йилларда терроризм ва экстремизмнинг бошқа зўравонлик кўринишларига қарши курашда ҳамкорлик қилиш Дастури ҳақидаги қарори;

2. Ўзбекистон Республикаси Ташқи ишлар вазирлиги Ўзбекистон Республикаси мазкур халқаро шартномалар кучга кириши учун зарур бўлган ички давлат тартиб-қоидаларини бажаргани тўғрисида тегишли билдиришнома йўлласин.

3. Ўзбекистон Республикаси Бош вазири ўринбосарлари ҳамда тегишли вазирлик ва идоралар раҳбарлари ушбу халқаро шартномалар кучга киргандан кейин белгиланган тартибда Ўзбекистон Республикаси мажбуриятлари ижроси устидан назоратни таъминласинлар.

4. Мазкур қарорнинг ижросини назорат қилиш Ўзбекистон Республикаси Бош вазири Ш.М. Мирзиёев зиммасига юклансин.

Ўзбекистон Республикаси Президенти И. КАРИМОВ

Тошкент ш.,
2006 йил 17 март,
ПҚ-306-сон

—

+

ЎЗБЕКИСТОН РЕСПУБЛИКАСИ ПРЕЗИДЕНТИНИНГ ҚАРОРИ

104 Шахсий ёрдамчи, деҳқон ва фермер хўжаликларида чорва молларни кўпайтиришни рағбатлантириш чора-тадбирлари тўғрисида

Шахсий ёрдамчи, деҳқон ва фермер хўжалиklarини ривожлантириш чора-тадбирлари изчил амалга ошириб борилаётгани, аҳолига қўшимча ер майдонлари берилаётганлиги, шунингдек уларга давлат томонидан тизимли ёрдам кўрсатиб келинаётгани шахсий ёрдамчи ва деҳқон хўжаликларида чорва моллар кўпайишига, ички истеъмол бозорини чорвачилик маҳсулотлари билан тўлдиришга имконият яратди.

Айни пайтда шахсий ёрдамчи, деҳқон ва фермер хўжалиklarини ривожлантириш ҳамда мустаҳкамлаш, биринчи навбатда қорамол боқиш ва етиштириш, шу асосда қишлоқ аҳолисининг бандлик даражасини кўтариш ва оилалар даромадини оширишнинг мавжуд имкониятларидан тўлиқ фойдаланилмаяпти. Чорва мол боқаётган шахсларни иш билан банд аҳоли тоифасига киритиш ва уларни ижтимоий муҳофаза қилиш масалалари ҳал этилмаган. Хўжалиklarни зотдор, сермахсул чорва мол билан, омухта ем ва ширали озуқа билан таъминлаш борасидаги ишлар қониқарсиз аҳволда, зооветеринария ва бошқа сервис хизматлари кўрсатиш бўйича инфратузилма тармоғи, шунингдек шахсий ёрдамчи ва деҳқон хўжалиklarида чорвачиликни ривожлантиришни микрокредитлаш тизими яхши йўлга қўйилмаган.

Ўзбекистон Республикаси Қонун ҳужжатлари тўплами, 2006 й.

Аҳолини, айниқса қишлоқ аҳолисини иш билан таъминлаш ва шу асосда оилалар даромадини оширишнинг муҳим омили сифатида чорва моллари, энг аввало қорамол боқаётган деҳқон ва фермер хўжаликлари сонини кўпайтириш учун зарур ҳуқуқий ва иқтисодий шарт-шароитлар яратиш мақсадида:

1. Белгилансинки, шахсий ёрдамчи ва деҳқон хўжаликларида қорамол боқиш билан банд бўлган шахслар, ўзлари етиштирган чорвачилик маҳсулотларидан қандай фойдаланишидан қатъи назар, иш билан таъминланган аҳоли тоифасига кирилади ва «Фуқароларнинг давлат пенсия таъминоти тўғрисида»ги Ўзбекистон Республикаси Қонунига мувофиқ пенсия билан таъминланиш ҳуқуқига эга бўладилар.

Шахсий ёрдамчи ва деҳқон хўжалигида қорамол боқиш билан банд бўлган жисмоний шахслар учун пенсия тайинлашда меҳнат стажи улар томонидан бюджетдан ташқари пенсия жамғармасига энг кам ойлик иш ҳақининг камида 50 фоизи миқдорда ойлик суғурта бадаллари тўланган тақдирда ҳисобга олинади.

Ўзбекистон Республикаси Вазирлар Маҳкамаси бир ҳафта муддатда Шахсий ёрдамчи ва деҳқон хўжаликларида қорамол боқаётган ва чорвачилик маҳсулотлари етиштираётган фуқароларнинг иш билан бандлиги тўғрисидаги низомни тасдиқласин, унда меҳнат дафтарчаларини очиш ва юритиш, меҳнат органларида ҳисобга олиш, пенсия тайинлаш учун меҳнат стажини ҳисоблаш ва бюджетдан ташқари Пенсия жамғармасига суғурта бадаллари тўлаш тартибини белгиласин.

2. 2006—2010 йиллар даврида шахсий ёрдамчи, деҳқон ва фермер хўжаликларида чорва моллари, биринчи навбатда қорамоллар сонини кўпайтиришни рағбатлантириш дастури маъқуллансин, унда:

минтақалар бўйича шахсий ёрдамчи, деҳқон ва фермер хўжаликларида қорамоллар сонини 1-2-иловаларга* мувофиқ кўпайтириш;

зооветеринария пунктлари ва чорва молларини сунъий урчитиш пунктлари тармоғини 3-иловага* мувофиқ кенгайтириш;

4-иловага* мувофиқ зотли молларни шахсий ёрдамчи, деҳқон ва фермер хўжаликларида аукционлар орқали сотиш назарда тутилсин.

Дастурнинг тасдиқланган параметрлари сўзсиз бажарилишини таъминлаш учун шахсий масъулият қишлоқ ва сув хўжалиги вазири (С. Исмоилов), Қорақалпоғистон Республикаси Вазирлар Кенгаши Раиси ва вилоятлар ҳокимлари зиммасига юклансин.

3. Ўзбекистон Республикаси Меҳнат ва аҳолини ижтимоий муҳофаза қилиш вазирлиги ва тижорат банкларининг қорамол сотиб олиш учун шахсий ёрдамчи ва деҳқон хўжаликларида 5 ва 5а-иловаларга* мувофиқ ҳажмларда микрокредитлар ажратишни кенгайтириш тўғрисидаги тақлифига розилик берилсин.

Ўзбекистон Республикаси Марказий банки Ўзбекистон Республикаси Меҳнат ва аҳолини ижтимоий муҳофаза қилиш вазирлиги ҳамда Молия вазирлиги билан биргаликда бир ой муддатда шахсий ёрдамчи ва деҳқон хўжаликларида чорвачиликни ривожлантириш учун фуқароларга ўзини ўзи бошқариш органлари — маҳалла кўмиталарининг кафилиги остида тижорат банклари томонидан имтиёзли мақсадли микрокредитлар ажратишнинг соддалаштирилган Тартибини тасдиқласин.

4. «Ҳомийлар ва шифокорлар йили» Дастурига мувофиқ Қорақалпоғистон Республикаси Вазирлар Кенгаши ва вилоятлар ҳокимликлари томонидан қишлоқ жойлардаги эҳтиёжманд ва кўп болали оилаларга, энг аввало мактабгача ва мактаб ёшидаги болалари бўлган оилаларга ҳар бир қишлоқ тумани бўйича камида 100—200 оилани камраб олган ҳолда, хомийлар, шунингдек нодавлат хайрия ташкилотларининг маблағлари ҳисобига бир бош сигир бериш йўли билан хайрия ёрдами

* 1—5, 5а-иловалар берилмайди.

кўрсатиш бўйича аниқ тадбирлар ишлаб чиқилгани маълумот учун қабул қилинсин.

Ўзбекистон Республикаси Вазирлар Маҳкамаси бир ҳафта муддатда Қишлоқ жойлардаги эҳтиёжманд кўп болали оилаларга қорамолни бепул бериш шартлари тўғрисидаги низомни тасдиқласин, унда чорва мол боқиш кўникмалари, шароит ва имкониятлари мавжудлиги, жумладан омухта ем ва ширали озуқа билан таъминлаш имкониятларини ҳисобга олган ҳолда эҳтиёжманд оилаларни аниқлашнинг қатъий мезонлари назарда тутилсин.

5. Қорақалпоғистон Республикаси Вазирлар Кенгаши, вилоятлар ҳокимликлари Ўзбекистон Республикаси Қишлоқ ва сув хўжалиги вазирлиги, «Ўздонмахсулот» акциядорлик компанияси билан биргаликда дон маҳсулотлари корхоналари томонидан ишлаб чиқариладиган омухта ем, шу жумладан шартномалар бўйича фермер хўжаликларидан сотиб олинadиган дондан ишлаб чиқариладиган омухта емни шахсий ёрдамчи ва деҳқон хўжаликлари бемалол олишини кенгайтириш чора-тадбирлари амалга оширилишини, 6-иловага* мувофиқ, туман марказлари ва йирик аҳоли пунктларида ихтисослаштирилган савдо шохобчаларини ташкил этиш учун зарур омборхоналарни бериш йўли билан таъминласинлар.

6. 7-иловага** мувофиқ, 2010 йилгача бўлган даврда наслчилик чорвачилик корхоналари ва хўжаликлари наслчилик чорвачилигини ривожлантириш учун республикага олиб келинадиган наслчилик материали, технология ва ёрдамчи ускуналарга бож тўловларидан озод қилинсин (божхона расмийлаштируви йиғимлари бундан мустасно).

7. 2006—2010 йиллар даврида шахсий ёрдамчи, деҳқон ва фермер хўжаликларидан чорва моллар, биринчи навбатда қорамоллар сонини кўпайтиришни рағбатлантириш дастури амалга оширилишини таъминлаш бўйича қабул қилиниши зарур бўлган норматив-ҳуқуқий ҳужжатлар рўйхати 8-иловага* мувофиқ тасдиқлансин.

8. Ўзбекистон Республикаси Вазирлар Маҳкамаси бир ҳафта муддатда ушбу қарор талабларини амалга ошириш бўйича Ҳукумат қарорини қабул қилсин.

9. Ўзбекистон Республикаси Адлия вазирлиги манфаатдор вазирликлар ва идоралар билан биргаликда бир ой муддатда Вазирлар Маҳкамасига амалдаги қонун ҳужжатларига мазкур қарордан келиб чиқадиган ўзгартиш ва қўшимчалар тўғрисида таклифлар киритсин.

10. Мазкур қарорнинг ижросини назорат қилиш Ўзбекистон Республикаси Бош вазири Ш. Мирзиёев зиммасига юклансин.

Дастурнинг бажарилиши йилнинг ҳар чорагида Ўзбекистон Республикаси Вазирлар Маҳкамаси, Қорақалпоғистон Республикаси Вазирлар Кенгаши ва вилоятлар ҳокимликлари мажлисларида кўриб чиқилсин

Ўзбекистон Республикаси Президенти И. КАРИМОВ

Тошкент ш.,
2006 йил 23 март,
ПҚ-308-сон

* 6-илова берилмайди.

** 7-илова рус тилидаги матнда берилган.

УЧИНЧИ БЎЛИМ

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

105 Ўзбекистон Республикаси Ҳукуматининг айрим қарорларига ўзгартиришлар киритиш тўғрисида

Ўзбекистон Республикаси Президентининг «Мева-сабзавотчилик ва узумчилик соҳасини ислоҳ қилиш бўйича ташкилий чора-тадбирлар тўғрисида» 2006 йил 11 январдаги ПҚ–255-сон қарорига мувофиқ Вазирлар Маҳкамаси **қарор қилади:**

Ўзбекистон Республикаси Ҳукуматининг иловага мувофиқ айрим қарорларига ўзгартиришлар киритилсин.

Ўзбекистон Республикасининг Бош вазири Ш. МИРЗИЁЕВ

Тошкент ш.,
2006 йил 24 март,
51-сон

Вазирлар Маҳкамасининг
2006 йил 24 мартдаги 51-сон қарорига
ЙЛОВА

Ўзбекистон Республикаси Ҳукуматининг айрим қарорларига киритилаётган ўзгартиришлар

1. Вазирлар Маҳкамасининг «Республика мева-сабзавот хўжалигида монополиядан чиқариш ва ихтисослаштиришни чуқурлаштириш чора-тадбирлари тўғрисида» 1997 йил 18 июлдаги 363-сон қарорига:

3-банднинг биринчи хатбоши ва иккинчи хатбошининг биринчи жумласи, 5-банд, шунингдек қарорга 2, 3, 3а-иловалар ўз кучини йўқотган деб ҳисоблансин;

4-банднинг иккинчи ва учинчи хатбошидаги ҳамда 20-банднинг учинчи хатбошидаги «Ўзмевасабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин;

6-банднинг биринчи хатбошидаги «Ўзмевасабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин;

11-банднинг биринчи хатбошидаги «Ўзмевасабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

2. Вазирлар Маҳкамасининг «Алкоголли маҳсулотлар ишлаб чиқариш ва уларнинг айланиши устидан давлат монополиясини кучайтириш ҳамда Ўзбекистон Республикаси ҳудудида алкогольли ва тамаки маҳсулотларини сотишдан бюджетга тушумни кўпайтириш юзасидан қўшимча чора-тадбирлар тўғрисида» 1998 йил 21 майдаги 221-сон қарори 1-бандининг тўртинчи хатбошидаги «Ўзмевасабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

3. Вазирлар Маҳкамасининг 1998 йил 2 июлдаги 275-сон қарори (Ўзбекистон

Ўзбекистон Республикаси Қонун ҳужжатлари тўплами, 2006 й.

Республикаси ҚТ, 1998 й., 7-сон, 23-модда) билан тасдиқланган Спирт ва алкоғолли маҳсулотларни ишлаб чиқариш, идишларга қуйиш, сақлаш ва улгуржи сотишни ҳисобга олиш ҳамда назорат қилишга оид низомда:

1 ва 2-бандлардаги, 3-банднинг учинчи хатбошидаги ҳамда 22-банддаги «Ўзме-васабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин;

5 ва 26-бандлардаги ҳамда 27-банднинг еттинчи хатбошидаги «Ўзме-васабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

4. Вазирлар Маҳкамасининг «Қишлоқ хўжалигида иқтисодий ислоҳотларни чуқурлаштириш соҳасидаги қонун ҳужжатларини амалга оширишга доир ташкилий чора-тадбирлар тўғрисида» 1998 йил 3 июлдаги 281-сон қарорида:

1-банднинг иккинчи хатбошидаги «Ўзме-васабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин;

2-банднинг иккинчи хатбошидаги «Ўзме-васабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

5. Вазирлар Маҳкамасининг «Товарларнинг айрим турларини ишлаб чиқариш ва сотишни давлат томонидан назорат қилишни кучайтиришга доир қўшимча чора-тадбирлар тўғрисида» 1998 йил 23 декабрдаги 532-сон қарори 1-бандининг биринчи хатбошидаги «Ўзме-васабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

6. Вазирлар Маҳкамасининг «Вино-ароқ маҳсулотларини улгуржи ва чакана сотишни тартибга солиш тўғрисида» 1999 йил 26 мартдаги 136-сон қарори (Ўзбекистон Республикаси ҚТ, 1999 й., 3-сон, 16-модда) 3-бандининг биринчи хатбошидаги ва 5-бандининг иккинчи хатбошидаги «Ўзме-васабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

7. Вазирлар Маҳкамасининг «Спирт, алкоғолли маҳсулотлар ва тамаки маҳсулотлари ишлаб чиқариш ва сотишни давлат томонидан тартибга солишни такомиллаштириш чора-тадбирлари тўғрисида» 1999 йил 23 сентябрдаги 444-сон қарори (Ўзбекистон Республикаси ҚТ, 1999 й., 9-сон, 58-модда) 6-бандининг иккинчи хатбошидаги «Ўзме-васабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

8. Вазирлар Маҳкамасининг «Ўзме-васабзавотузумсаноат-холдинг» холдинг компанияси фаолиятини такомиллаштириш чора-тадбирлари тўғрисида» 2000 йил 4 мартдаги 78-сон қарори 1-бандининг иккинчи хатбошидаги, 3, 7 ва 8-бандларидаги, шунингдек қарорга 1-илованинг номидаги «Ўзме-васабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

9. Вазирлар Маҳкамасининг «Чимён-Чорвоқ курорт-рекреация зонасининг табиий бойликларини сақлаб қолиш ҳамда дам олиш ва соғломлаштириш тизимини такомиллаштиришга доир қўшимча чора-тадбирлар тўғрисида» 2001 йил 6 сентябрдаги 362-сон қарорига 1-илованинг 4-бандидаги «Ўзме-васабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

10. Вазирлар Маҳкамасининг «Вино-ароқ маҳсулотларини улгуржи ва чакана сотишни тартибга солиш тўғрисида» 2001 йил 16 ноябрдаги 452-сон қарори (Ўзбекистон Республикаси ҚТ, 2001 й., 11-12-сон, 63-модда) 1-бандининг иккинчи ва учинчи хатбошидаги «Ўзме-васабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

11. Вазирлар Маҳкамасининг «Дон тайёрлаш ва нон маҳсулотлари ишлаб чиқариш тизимида харажатларни қисқартириш чора-тадбирлари тўғрисида» 2002 йил

4 декабрдаги 424-сон қарорига 1-илованинг 9-бандидаги «Ўзмевабазавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

12. Вазирлар Маҳкамасининг «Ўзбекистон Республикаси Давлат божхона қўмитаси органлари учун кадрлар тайёрлаш тизимини янада такомиллаштириш тўғрисида» 2003 йил 22 майдаги 229-сон қарорининг (Ўзбекистон Республикаси ҚТ, 2003 й., 5-сон 40-модда) 12-бандидаги «Ўзмевабазавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

13. Вазирлар Маҳкамасининг «Ўзавтойўл» давлат акциядорлик компанияси ва Ўзбекистон Республикаси Молия вазирлиги ҳузуридаги Республика йўл жамғармаси фаолиятини ташкил этиш масалалари тўғрисида» 2003 йил 21 августдаги 361-сон қарорига (Ўзбекистон Республикаси ҚТ, 2003 й., 8-сон, 74-модда) 7-иловадаги «Аюпов А.М. — «Ўзмевабазавотузумсаноат-холдинг» холдинг компанияси раиси» сўзлари «лавозимига кўра — «Ўзвиносаноат-холдинг» холдинг компанияси раиси» сўзлари билан алмаштирилсин.

14. Вазирлар Маҳкамасининг «Этил спирти ишлаб чиқарувчи корхоналарни бошқариш тузилмасини такомиллаштириш тўғрисида» 2004 йил 15 январдаги 21-сон қарори 3-бандининг тўртинчи хатбошидаги, 4-бандининг тўртинчи ва бешинчи хатбошидаги, шунингдек қарорга 2 ва 4-иловалардаги «Ўзмевабазавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

15. Вазирлар Маҳкамасининг «Қишлоқ хўжалигида иқтисодий ислохотларни чуқурлаштириш бўйича Республика комиссияси фаолиятини такомиллаштириш тўғрисида» 2004 йил 25 февралдаги 87-сон қарорига (Ўзбекистон Республикаси ҚТ, 2004 й., 2-сон, 15-модда) 1-иловадаги ва 2-илованинг 18-бандидаги «Аюпов А.М. — «Ўзмевабазавотузумсаноат-холдинг» холдинг компанияси раиси» сўзлари ва «Ўзмевабазавотузумсаноат-холдинг» сўзлари тегишли равишда «лавозимига кўра — «Ўзвиносаноат-холдинг» холдинг компанияси раиси» ва «Ўзвиносаноат-холдинг» сўзлари билан алмаштирилсин.

16. Вазирлар Маҳкамасининг «Ўзбекистон Республикасининг Европа Иттифоқи ва унга аъзо давлатлар билан ҳамкорлигини такомиллаштириш чора-тадбирлари тўғрисида» 2004 йил 22 мартдаги 134-сон қарорига 1-илованинг 5.22-бандидаги «Ўзмевабазавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

17. Вазирлар Маҳкамасининг «Корхоналарда халқаро стандартларга мувофиқ бўлган сифатни бошқариш тизимларини жорий этиш чора-тадбирлари тўғрисида» 2004 йил 22 июлдаги 349-сон қарорига (Ўзбекистон Республикаси ҚТ, 2004 й., 7-сон, 73-модда) 1-илованинг «Ўзмевабазавотузумсаноат-холдинг» холдинг компанияси бўлими номидаги «Ўзмевабазавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

18. Вазирлар Маҳкамасининг «Чехия Республикаси билан ҳамкорликни янада ривожлантириш чора-тадбирлари тўғрисида» 2004 йил 3 декабрдаги 568-сон қарорига илованинг II бўлими 12-бандидаги «Ўзмевабазавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

19. Вазирлар Маҳкамасининг «Этил спирти ва алкогольли маҳсулотлар ишлаб чиқариш фаолиятини лицензиялаш тўғрисидаги низомни тасдиқлаш ҳақида» 2005 йил 30 декабрдаги 285-сон қарорига (Ўзбекистон Республикаси ҚТ, 2005 й., 11-12-сон, 68-модда):

1-иловада:

«Аюпов А.М. — «Ўзмевабазавотузумсаноат-холдинг» холдинг компанияси раиси» сўзлари «лавозимига кўра — «Ўзвиносаноат-холдинг» холдинг компанияси раиси» сўзлари билан алмаштирилсин;

«Ўзмева-сабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин;

6-банднинг учинчи хатбошидаги, 7-банднинг бешинчи хатбошидаги, 10-банднинг «д» кичик бандидаги ҳамда 2-илованинг 11-банди бешинчи хатбошидаги «Ўзмева-сабзавотузумсаноат-холдинг» сўзлари «Ўзвиносаноат-холдинг» сўзлари билан алмаштирилсин.

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

106 Истеъмол товарлари улгуржи савдоси тизимини та-комиллаштириш чора-тадбирлари тўғрисида

Ўзбекистон Республикаси Президентининг «Улгуржи ва чакана савдони либераллаштириш ҳамда уни ривожлантириш учун қулай шарт-шароит яратиш чора-тадбирлари тўғрисида» 2006 йил 23 февралдаги ПФ–3722-сон Фармони ҳамда Ўзбекистон Республикаси Президентининг «Улгуржи савдо корхоналари уюшмаси фаолиятини ташкил этиш тўғрисида» 2006 йил 6 мартдаги ПҚ–300-сон қарорини бажариш юзасидан Вазирлар Маҳкамаси **қарор қилади:**

1. Улгуржи савдо корхоналари уюшмаси:

чакана савдо корхоналари республика ҳудудида жойлашган жойидан қатъи назар, улгуржи ташкилотлар билан ҳамда истеъмол товарлари ишлаб чиқарувчи корхоналар билан шартномалар тузиш ҳуқуқига эга эканлиги принципига риоя этилишини ҳисобга олган ҳолда, улгуржи ва чакана савдо ўртасида фақат ихтиёрий ва шерикчилик асосида шартномавий муносабатларни ривожлантиришда;

Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари билан биргаликда — минтакаларда вилоят, вилоятлараро ва туманлараро базаларни, шу жумладан товарларнинг асосий гуруҳлари бўйича ихтисослаштирилган базаларни босқичма-босқич шакллантиришда Республика ихтисослаштирилган улгуржи база-контораларига кўмаклашсин.

2. Қўйидагилар:

Республика ихтисослаштирилган улгуржи база-контораларини, ҳудудий (вилоят, вилоятлараро ва туманлараро) базаларни рўйхатдан ўтказиш, шунингдек улар томонидан улгуржи савдони амалга ошириш тартиби тўғрисидаги низом 1-иловага мувофиқ;

Улгуржи савдо корхоналари уюшмаси таркибига кирувчи Республика ихтисослаштирилган улгуржи база-конторалари, ҳудудий (вилоят, вилоятлараро ва туманлараро) базалар, шунингдек вилоятлар «Матлуботсавдо» акциядорлик компанияларининг истеъмол товарлари улгуржи савдосини амалга ошириш фаолиятини лицензиялаш тартиби тўғрисидаги низом 2-иловага мувофиқ тасдиқлансин.

3. Республика ихтисослаштирилган улгуржи база-конторалари:

ички истеъмол бозори конъюнктурасини пухта ўрганиш асосида уни товарлар билан тўлдириш дастурини шакллантирсинлар, истеъмол товарлари ишлаб чиқарадиган республика корхоналари билан узоқ муддатли савдо алоқалари тизимини ташкил этишга йўналтирилган чора-тадбирларни амалга оширсинлар;

ишларни самарали ташкил этиш ҳамда чакана савдо ва аҳоли ишончини қозониш йўли билан улгуржи бозорда ўз мавқеларини изчил мустаҳкамласинлар;

чакана савдо учун қулай шарт-шароитлар яратиш, шу жумладан истеъмол кредитлари бериш, шунингдек келгусида ўз чакана савдо тармоғини ривожлантириш мақсадида етарли ресурслар ва тажрибани аста-секин шакллантирсинлар.

Улгуржи савдо корхоналари уюшмаси I ярим йиллик ва умуман 2006 йил якунлари бўйича амалга оширилган ишлар натижалари тўғрисида Вазирлар Маҳкамасига ахборот берсин.

4. Белгилансинки, Республика ихтисослаштирилган улгуржи база-контораларининг, уларнинг ҳудудий базаларининг йўқотишлардан ва ноликвид товарлар нарҳини пасайтиришдан кўрган зарарлари фақат базаларнинг ўз даромадлари ҳисобига қопланади.

5. Тижорат банкларига Улгуржи савдо корхоналари уюшмаси таркибига кирувчи Республика ихтисослаштирилган улгуржи база-контораларига, ҳудудий (вилоят, вилоятлараро ва туманлараро) базаларга уларнинг мамлакатимиз корхоналаридан истеъмол товарлари харид қилишга йўналтириладиган айланма маблағларини тўлдириш учун қисқа муддатли кредитлар ажратиш тавсия этилсин.

6. Ўзбекистон Республикаси Адлия вазирлиги белгиланган тартибда:

Улгуржи савдо корхоналари уюшмаси таркибига кирувчи Республика ихтисослаштирилган улгуржи база-конторалари ва ҳудудий (вилоят, вилоятлараро ва туманлараро) базаларни рўйхатдан ўтказсин;

Улгуржи савдо корхоналари уюшмаси таркибига кирувчи кўрсатиб ўтилган база-контораларга, ҳудудий базаларга, вилоят «Матлуботсавдо» акциядорлик компанияларига Ўзбекистон Республикаси Президентининг 2006 йил 23 февралдаги ПФ-3722-сон Фармонида ва мазкур қарор билан тасдиқланган норматив-ҳуқуқий ҳужжатларда назарда тутилган талабларга риоя қилишни ҳисобга олган ҳолда истеъмол товарлари улгуржи савдосини амалга ошириш ҳуқуқига лицензиялар берсин.

7. Ўзбекистон Республикаси Иқтисодиёт вазирлиги, Молия вазирлиги, Давлат солиқ қўмитаси, Монополиядан чиқариш, рақобат ва тадбиркорликни қўллаб-қувватлаш давлат қўмитаси Адлия вазирлиги билан биргаликда икки ой муддатда ҳудудий «Матлуботсавдо» акциядорлик компаниялари фаолиятини муфассал ўрганиб чиқсинлар ҳамда улар фаолиятини ташкил этишни такомиллаштириш ва самарадорлигини ошириш, қишлоқ жойлардаги, бориш қийин бўлган ҳамда тоғли туманлардаги аҳолининг зарур истеъмол товарларига эҳтиёжларини янада тўлиқ қондириш юзасидан аниқ таклифлар киритсинлар.

8. Ўзбекистон Республикаси Адлия вазирлиги манфаатдор вазирликлар ва идоралар билан биргаликда бир ой муддатда амалдаги қонун ҳужжатларига ушбу қарордан келиб чиқадиган ўзгартириш ва қўшимчалар тўғрисида таклифлар киритсин.

9. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари В.А. Голишев зиммасига юклансин.

Ўзбекистон Республикасининг Бош вазири Ш. МИРЗИЁЕВ

Тошкент ш.,
2006 йил 27 март,
52-сон

Вазирлар Маҳкамасининг
2006 йил 27 мартдаги 52-сон қарорига
1-ИЛОВА

**Республика ихтисослаштирилган улгуржи база-контораларини,
худудий (вилоят, вилоятлараро ва туманлараро) базаларни
рўйхатдан ўтказиш, шунингдек улар томонидан улгуржи савдони
амалга ошириш тартиби тўғрисида
НИЗОМ**

**I. Республика ихтисослаштирилган улгуржи база-контораларини ва
худудий (вилоят, вилоятлараро ва туманлараро) базаларни рўйхатдан
ўтказиш тартиби**

1. Республика ихтисослаштирилган улгуржи база-контораларини ва худудий (вилоят, вилоятлараро ва туманлараро) базаларни рўйхатдан ўтказиш Ўзбекистон Республикаси Адлия вазирлиги томонидан, Ўзбекистон Республикаси Вазирлар Маҳкамасининг 2003 йил 20 августдаги 357-сон қарори билан тасдиқланган Тадбиркорлик субъектларини давлат рўйхатидан ўтказиш, ҳисобга қўйиш ва рухсат берувчи ҳужжатларни расмийлаштириш тартиби тўғрисидаги низомга мувофиқ амалга оширилади.

2. Республика ихтисослаштирилган улгуржи база-конторалари, худудий (вилоят, вилоятлараро ва туманлараро) базалар муассислари томонидан тақдим этиладиган таъсис ҳужжатларида:

— шакллантириладиган устав фонди (улгуржи савдо корхоналари — акциядорлик жамиятлари учун — қонун ҳужжатларида белгиланган миқдорда, бошқа улгуржи савдо корхоналари учун — энг кам ойлик иш ҳақининг камида 3500 баравари миқдорида, улардан пул маблағлари билан — энг кам ойлик иш ҳақининг камида 1200 баравари миқдорида) тўғрисидаги;

— фаолият тури — истеъмол товарлари улгуржи савдоси тўғрисидаги маълумотлар мавжуд бўлиши керак.

II. Истеъмол товарлари улгуржи савдосини амалга ошириш тартиби

3. Республика ихтисослаштирилган улгуржи база-конторалари ва худудий (вилоят, вилоятлараро ва туманлараро) базалар (кейинги ўринларда сотувчилар деб аталади) Ўзбекистон Республикаси Адлия вазирлиги томонидан, қонун ҳужжатларида белгиланган тартибда бериладиган истеъмол товарлари улгуржи савдосини амалга ошириш ҳуқуқига лицензия мавжуд бўлганда улгуржи савдо фаолиятини амалга ошириш ҳуқуқига эга.

4. Улгуржи савдо фаолиятини амалга ошириш учун сотувчиларда ўзининг ёки ижарага олинган омборхона бинолари, сонутиш (зарурият бўлганда), кўтариш-тушириш ва транспорт ускуналари, тегишли инфратузилма — автомобиль ва темир йўл кириш йўллари, электр энергияси ва сув таъминоти тармоқлари мавжуд бўлиши керак.

5. Сотувчилар товарларнинг етказиб берувчиларини ва харидорларини шартнома асосида мустақил равишда танлаб олиш ҳуқуқига эга ҳамда сотилган товарларнинг кейинчалик фойдаланилиши учун жавоб бермайдилар.

6. Сотувчилар томонидан истеъмол товарлари худудий жойлашувидан қатъи

назар, ҳар қандай ҳўжалик юритувчи субъектларга, шу жумладан белгиланган тартибда чакана савдо фаолияти билан шуғулланаётган ва назорат-касса машиналари билан жиҳозланган турғун савдо тармоғига эга бўлган юридик шахсларга, махсус истеъмолчиларга, давлат таъминотидаги муассасаларга, ишлаб чиқариш корхоналарига улгуржи сотилади.

Товарлар жисмоний шахсларга фақат якка тартибдаги тадбиркор сифатида рўйхатдан ўтказилганлиги тўғрисидаги гувоҳнома ва қонун ҳужжатларида белгиланган шаклдаги чакана савдони амалга оширишга рухсат берувчи гувоҳнома мавжуд бўлганда улгуржи сотилади.

7. Республика ихтисослаштирилган улгуржи база-конторалари истеъмол товарларини уларнинг таркибига кирувчи ҳудудий базаларга, шунингдек вилоятлар «Матлуботсавдо» акциядорлик компанияларига улгуржи сотиш ҳуқуқига эга.

8. Товарларни улгуржи сотиш фақат тузилган шартномалар асосида ва ўзаро ҳисоб-китобларнинг нақдинасиз шаклида амалга оширилиши мумкин.

III. Сотувчиларнинг вазифалари

9. Савдо фаолиятини амалга оширишда сотувчилар:

товарларнинг сотиб олинганлигини тасдиқловчи (шартнома, счёт-фактура, товар-йўл ҳужжатлари) ҳужжатларга;

мувофиқлик сертификатига, товарларнинг ишлаб чиқариш корхоналарида сертификатланганлиги тўғрисидаги маълумотлар ёки уларнинг нусхаларига — мажбурий тартибда сертификатланиши лозим бўлган товарлар сотилганда;

истеъмол товарлари улгуржи савдосини амалга оширишга лицензияга эга бўлишлари керак.

IV. Мазкур Низомга риоя этилиши юзасидан жавобгарлик

10. Лицензиясиз ёхуд лицензиянинг амал қилиши тўхтатиб турилган даврда улгуржи савдони амалга ошириш қонун ҳужжатларига мувофиқ жавобгарликка олиб келади.

Вазирлар Маҳкамасининг
2006 йил 27 мартдаги 52-сон қарорига
2-ИЛОВА

**Улгуржи савдо корхоналари уюшмаси таркибига кирувчи
Республика ихтисослаштирилган улгуржи база-конторалари,
ҳудудий (вилоят, вилоятлараро ва туманлараро) базалар,
шунингдек вилоятлар «Матлуботсавдо» акциядорлик
компанияларининг истеъмол товарлари улгуржи савдосини
амалга ошириш фаолиятини лицензиялаш тартиби тўғрисида
НИЗОМ**

I. Умумий қоидалар

1. Мазкур Низом Ўзбекистон Республикаси Президентининг «Улгуржи ва чакана савдони либераллаштириш ҳамда уни ривожлантириш учун қулай шарт-шароит яратиш чора-тадбирлари тўғрисида» 2006 йил 23 февралдаги ПФ-3722-сон Фармониغا, Ўзбекистон Республикаси Президентининг «Улгуржи савдо корхоналари уюшмаси фаолиятини ташкил этиш тўғрисида» 2006 йил 6 мартдаги ПҚ-300-сон қарорига мувофиқ қўйидагиларнинг:

Улгуржи савдо корхоналари уюшмаси тизимига кирувчи Республика ихтисослаштирилган улгуржи база-конторалари ва ҳудудий (вилоят, вилоятлараро ва туманлараро) базаларнинг;

— вилоятлар «Матлуботсавдо» акциядорлик компанияларининг ва улар таркибига кирувчи улгуржи савдо корхоналарининг истеъмол товарлари улгуржи савдосини амалга ошириш фаолиятини лицензиялаш тартибини белгилайди. +

2. Мазкур Низомда назарда тутилган тартибда берилган лицензия улгуржи савдо корхоналарига:

ҳудудий жойлашувидан қатъи назар, хўжалик юритувчи субъектларга, шу жумладан белгиланган тартибда чакана савдо фаолиятини амалга ошираётган ва назорат-касса машиналари билан жиҳозланган турғун савдо тармоғига эга бўлган юридик шахсларга, махсус истеъмолчиларга, давлат таъминотидаги муассасаларга, ишлаб чиқариш корхоналарига товарларни улгуржи сотиш;

фақат якка тартибдаги тадбиркор сифатида рўйхатдан ўтказилганлиги тўғрисидаги гувоҳномаси ва қонун ҳужжатларида белгиланган шаклдаги чакана савдони амалга оширишга рухсат берувчи гувоҳномаси мавжуд бўлган жисмоний шахсларга товарларни кичик туркумлар билан улгуржи сотиш ҳуқуқини беради.

Республика ихтисослаштирилган улгуржи база-конторалари ва уларнинг ҳудудий базалари Ўзбекистон Республикаси Президентининг «Улгуржи ва чакана савдони либераллаштириш ҳамда уни ривожлантириш учун қулай шарт-шароит яратиш чора-тадбирлари тўғрисида» 2006 йил 23 февралдаги ПФ-3722-сон Фармониغا мувофиқ беш йил муддатга мулк солиғи тўлашдан озод қилинган.

Республика ихтисослаштирилган улгуржи база-конторалари Улгуржи савдо корхоналари уюшмаси тизимига кирувчи ҳудудий (вилоят, вилоятлараро ва туманлараро) базаларга, шунингдек вилоятлар «Матлуботсавдо» акциядорлик компанияларига ва улар таркибига кирувчи улгуржи савдо корхоналарига истеъмол товарларини улгуржи сотиш ҳуқуқига ҳам эгадирлар.

3. Мазкур Низомнинг 1-бандида кўрсатилган корхоналарнинг истеъмол товарлари улгуржи савдосини амалга ошириш фаолиятини лицензиялаш Ўзбекистон

Республикаси Адлия вазирлиги томонидан (кейинги ўринларда лицензияловчи орган деб аталади) амалга оширилади.

4. Лицензияловчи орган томонидан лицензия талабгорининг аризаси кўриб чиқилганлиги учун қонун ҳужжатларида белгиланган энг кам ойлик иш ҳақининг бир баравари миқдорида йиғим ундирилади. Лицензия бериш юзасидан ҳужжатлар кўриб чиқилганлиги учун йиғим суммаси лицензияловчи орган ҳисоб рақамига ўтказилади.

5. Лицензия берилганлиги учун қонун ҳужжатларида белгиланган энг кам ойлик иш ҳақининг икки баравари миқдорида давлат божи ундирилади. Давлат божи суммаси республика бюджетига ўтказилади.

6. Истеъмол товарлари улгуржи савдоси фаолиятини амалга ошириш учун лицензия чекланмаган муддатга берилади.

II. Лицензия талаблари ва шартлари

7. Қўйидагилар истеъмол товарлари улгуржи савдоси фаолиятини амалга оширишда лицензия талаблари ва шартлари ҳисобланади:

улгуржи савдо фаолиятини амалга оширишни тартибга солувчи Ўзбекистон Республикаси қонун ҳужжатларига риоя этилиши;

улгуржи савдо корхоналари — акциядорлик жамиятлари учун — қонун ҳужжатларида белгиланган миқдорда, бошқа улгуржи савдо корхоналари учун — энг кам ойлик иш ҳақининг камида 3500 баравари миқдорида, улардан пул маблағлари билан — энг кам ойлик иш ҳақининг камида 1200 баравари миқдорида шакллантирилган устав фондининг мавжуд бўлиши;

ўзининг ёки ижарага олинган омборхона бинолари, совутиш (зарурият бўлганда), кўтариш-тушириш ва транспорт ускуналари, тегишли инфратузилма — автомобиль ва темир йўл кириш йўллари, электр энергияси ва сув таъминоти тармоқлари мавжуд бўлиши;

мувофиқлик сертификатлари ёки маҳсулотларнинг ишлаб чиқариш корхоналарида сертификатланганлиги тўғрисидаги маълумотлар ёхуд уларнинг нусхалари мавжуд бўлиши — мажбурий тартибда сертификатланиши лозим бўлган товарлар сотилганда;

лицензия талабгорининг Улгуржи савдо корхоналари уюшмаси ёки вилоят «Матлуботсавдо» акциядорлик компаниялари тизимидаги кириши.

III. Лицензия олиш учун зарур ҳужжатлар

8. Лицензия олиш учун лицензия талабгори лицензияловчи органга қўйидаги ҳужжатларни тақдим этади:

а) юридик шахснинг номи ва ташкилий-ҳуқуқий шакли, жойлашган жойи (почта манзили), банк муассасасининг номи ва банкдаги ҳисоб рақами, фаолиятнинг лицензияланадиган тури кўрсатилган ҳолда лицензия бериш тўғрисидаги ариза;

б) улгуржи савдо корхоналари учун шакллантирилган устав фондининг мавжудлигини тасдиқловчи ҳужжат нусхаси;

в) ўзининг ёки ижарага олинган омборхона бинолари, совутиш (зарурият бўлганда), кўтариш-тушириш ва транспорт ускуналари, тегишли инфратузилма — автомобиль ва темир йўл кириш йўллари, электр энергияси ва сув таъминоти тармоқларининг мавжудлигини тасдиқловчи ҳужжатлар;

г) лицензия талабгорининг Улгуржи савдо корхоналари уюшмаси тизимига киришини тасдиқловчи ҳужжатлар;

д) лицензия бериш тўғрисидаги ариза лицензияловчи орган томонидан кўриб чиқилганлиги учун йиғим тўланганлигини тасдиқловчи ҳужжат.

9. Лицензия талабгоридан мазкур Низомда назарда тутилмаган ҳужжатлар тақдим этилишини талаб этишга йўл қўйилмайди.

10. Ҳужжатлар лицензия талабгори томонидан лицензияловчи органга бевосита ёхуд улар олинганлигини тасдиқловчи билдиришнома билан почта алоқаси воситаси орқали берилади.

11. Ҳужжатлар лицензияловчи органнинг масъул ходими томонидан рўйхат бўйича қабул қилинади, унинг нусхаси ҳужжатлар қабул қилиб олинган сана кўрсатилган ҳолда лицензия талабгорига юборилади (топширилади).

IV. Аризани кўриб чиқиш ва лицензия бериш ёки лицензия беришни рад этиш тўғрисида қарор қабул қилиш

12. Ҳужжатларни кўриб чиқиш ва истеъмол товарлари улгуржи савдоси фаолиятини амалга оширишга лицензия бериш ёки лицензия беришни рад этиш тўғрисида қарор қабул қилиш муддати рўйхатдан ўтказиш учун белгиланган муддатдан ортиқ бўлмаслиги керак.

13. Лицензияловчи орган лицензия талабгорини қабул қилинган қарор тўғрисида тегишли қарор қабул қилинган кундан кейин бир иш куни мобайнида хабардор қилади.

Лицензия беришга қарор қилинганлиги тўғрисидаги билдиришнома банк ҳисоб рақамининг реквизитлари ва давлат божини тўлаш муддати кўрсатилган ҳолда ёзма шаклда лицензия талабгорига юборилади (топширилади).

14. Лицензия битими лицензияловчи орган билан лицензиат ўртасида тузилади ҳамда унда қўйидагилар бўлиши керак:

битимни имзолаган шахсларнинг фамилияси, исми, отасининг исми, эгаллаб турган лавозими;

томонларнинг реквизитлари;

амалга оширилишига лицензия берилаётган фаолият турининг номи;

лицензиатга қўйиладиган лицензия талаблари ва шартлари;

лицензия битими талаблари ва шартлари бузилганлиги учун томонларнинг жавобгарлиги;

лицензиат томонидан лицензия битими талаблари ва шартлари бажарилишини лицензияловчи орган томонидан назорат қилиш тартиби.

Лицензия битими икки нусхада — лицензиат ва лицензияловчи орган учун бир нусхадан тузилади.

15. Лицензиялар лицензияловчи орган томонидан мазкур Низомга иловага мувофиқ шаклдаги бланкаларда расмийлаштирилади ҳамда Ўзбекистон Республикаси Адлия вазирининг ваколатли ўринбосари томонидан имзоланади.

Лицензия бланкалари қатъий ҳисобда турадиган ҳужжатлар ҳисобланади, ҳисобга олиш сериясига, тартиб рақамига ва ҳимояланганлик даражасига эга бўлади.

Лицензия бланкалари Ўзбекистон Республикаси Вазирлар Маҳкамасининг 2000 йил 20 декабрдаги 488-сон қарорига мувофиқ тайёрланади.

16. Республика ихтисослаштирилган улгуржи база-контораси таркибига кирувчи ҳудудий базага (филиал, шўъба корхонага) лицензия таркибига база кирувчи

Республика ихтисослаштирилган улгуржи база-конторасининг тартиб рақамига каср орқали ҳудудий базанинг индекси (тартиб рақами) қўшилган ҳолда берилади.

Вилоят «Матлуботсавдо» акциядорлик компанияси тизимининг улгуржи савдо корхонасига лицензия таркибига улгуржи савдо корхонаси кирувчи вилоят «Матлуботсавдо» акциядорлик компаниясининг тартиб рақамига каср орқали улгуржи савдо корхонасининг индекси (тартиб рақами) қўшилган ҳолда берилади.

Лицензия мазкур Низомга иловага мувофиқ шакл бўйича берилади.

17. Лицензия талабгори томонидан давлат божи тўланганлигини тасдиқловчи ҳужжат тақдим этилган кунда лицензия битими тузилади ва лицензия берилади.

18. Лицензиат лицензия бериш тўғрисида қарор қабул қилинганлиги ҳақидаги билдиришнома юборилган (топширилган) вақтдан бошлаб уч ой мобайнида лицензияловчи органга лицензия берилганлиги учун давлат божи тўланганлигини тасдиқловчи ҳужжатни тақдим этмаган ёхуд лицензия битимини имзоламаган тақдирда, лицензияловчи орган лицензияни бекор қилишга ҳақлидир.

19. Лицензия бериш «Фаолиятнинг айрим турларини лицензиялаш тўғрисида»-ги Ўзбекистон Республикаси Қонунининг 17-моддасида назарда тутилган асослар бўйича рад этилиши мумкин.

Лицензия беришни бошқа асослар бўйича, шу жумладан мақсадга мувофиқ эмаслиги сабабларига кўра рад этишга йўл қўйилмайди.

Лицензия талабгори лицензия бериш рад этилиши тўғрисидаги қарор, шунингдек лицензияловчи орган мансабдор шахсининг хатти-ҳаракати (ҳаракатсизлиги) юзасидан қонун ҳужжатларида белгиланган тартибда шикоят қилиш ҳуқуқига эга.

20. Лицензия беришни рад этиш тўғрисида қарор қабул қилинган тақдирда рад этиш тўғрисидаги билдиришнома лицензия талабгорига тегишли қарор қабул қилингандан кейин бир кун мобайнида рад этишнинг аниқ сабаблари ва лицензия талабгори кўрсатиб ўтилган сабабларни бартараф этиб ҳужжатларни такроран кўриб чиқишга тақдим этиши учун етарли бўлган муддат кўрсатилган ҳолда ёзма шаклда юборилади (топширилади).

21. Лицензия талабгори томонидан лицензия бериш рад этилишига асос бўлган сабаблар бартараф этилган тақдирда, ҳужжатларни такроран кўриб чиқиш лицензия талабгорининг аризаси барча зарур ҳужжатлар билан биргаликда олинган кундан бошлаб бир иш кунидан ортиқ бўлмаган муддатда амалга оширилади.

Лицензия талабгорларининг аризалари такроран кўриб чиқилганлиги учун йиғим ундирилмайди.

Лицензия бериш рад этилганлиги тўғрисидаги билдиришномада кўрсатилган муддат ўтгандан кейин берилган ариза янгидан берилган ариза ҳисобланади.

V. Лицензияни қайта расмийлаштириш, дубликат бериш

22. Лицензиат қайта ташкил этилганда, унинг номи ёки жойлашган жойи (почта манзили) ўзгарганда лицензиат ёки унинг ҳуқуқий вориси қайта рўйхатдан ўтказилгандан ёхуд жойлашган жойи ўзгаргандан кейин бир ҳафта муддатда кўрсатиб ўтилган маълумотларни тасдиқловчи тегишли ҳужжатларни илова қилган ҳолда лицензияни қайта расмийлаштириш учун лицензияловчи органга мурожаат қилиши шарт.

23. Лицензия қайта расмийлаштирилгунга қадар лицензиат лицензияда кўрсатилган фаолиятни илгари берилган лицензия асосида амалга оширади.

24. Лицензияловчи орган лицензияни қайта расмийлаштиришда лицензиялар реестрига тегишли ўзгартиришлар киритади. Лицензияларни қайта расмийлашти-

риш лицензияловчи орган томонидан тегишли ҳужжатлар илова қилинган ҳолда лицензияни қайта расмийлаштириш тўғрисида ариза олинган кундан бошлаб икки кун мобайнида амалга оширилади.

Лицензияни қайта расмийлаштиришда қонун ҳужжатларида белгиланган энг кам ойлик иш ҳақининг ярми миқдорида йиғим ундирилади. Лицензия қайта расмийлаштирилганлиги учун йиғим суммаси лицензияловчи орган ҳисоб рақамига ўтказилади.

25. Йўқотиб қўйилган ёки яроқсиз ҳолга келиб қолган лицензия ўрнига лицензиатнинг аризасига кўра унинг дубликати берилиши мумкин.

Лицензиат лицензия дубликати олиш учун лицензияловчи органга, юридик шахснинг номи, ташкилий-ҳуқуқий шакли кўрсатилган ҳолда, лицензия дубликати бериш тўғрисида ариза ҳамда лицензия дубликати берилгани учун йиғим тўланганлигини тасдиқловчи ҳужжат тақдим этади.

Лицензия дубликати беришда қонун ҳужжатларида белгиланган энг кам ойлик иш ҳақининг ярми миқдорида йиғим ундирилади. Лицензия дубликати берилгани учун йиғим суммаси лицензияловчи орган ҳисоб рақамига ўтказилади.

VI. Лицензия талаблари ва шартларига риоя этилишини назорат қилиш

26. Лицензия талаблари ва шартларига риоя қилиниши устидан назорат тегишли назорат органлари томонидан қонун ҳужжатларида белгиланган тартибда текширишлар ўтказиш йўли билан амалга оширилади.

Тегишли назорат органлари лицензия талаблари ва шартларига риоя этилишини текшириш чоғида пайдо бўладиган масалалар юзасидан лицензиатдан зарур ахборотни сўраши ва олиши мумкин.

Текширишлар натижалари асосида текшириш далолатномаси тузилади. Бузилишлар аниқланган тақдирда текшириш далолатномасида лицензия талаблари ва шартларининг аниқ бузилишлари кўрсатилади.

Текшириш далолатномаси нусхаси лицензияловчи органга юборилади, лицензияловчи орган лицензиатга лицензия талаблари ва шартларининг аниқланган бузилишларини бартараф этиш мажбуриятини юқловчи қарор чиқаради ҳамда бундай бузилишларни бартараф этиш муддатларини белгилайди.

27. Текшириш далолатномаси икки нусхада тузилади, улардан бир нусхаси лицензиатга берилади, иккинчи нусхаси назорат органида қолади.

VII. Лицензиянинг амал қилишини тўхтатиб туриш, тўхтатиш, лицензияни бекор қилиш

28. Лицензиянинг амал қилишини ўн иш кунидан ортиқ бўлмаган муддатга тўхтатиб туриш «Фаолиятнинг айрим турларини лицензиялаш тўғрисида»ги Ўзбекистон Республикаси Қонунининг 22-моддасига мувофиқ, лицензияловчи орган томонидан амалга оширилади.

Лицензиянинг амал қилишини ўн иш кунидан ортиқ муддатга тўхтатиб туриш суд тартибда амалга оширилади.

Лицензияловчи органнинг лицензиянинг амал қилишини тўхтатиб туриш тўғрисидаги қарори юзасидан судга шикоят қилиниши мумкин. Лицензиянинг амал қилишини тўхтатиб туриш асоссиз эканлиги суд томонидан эътироф этилган тақдирда,

лицензияловчи орган лицензиат олдида лицензиатга етказилган зарар миқдориди жавоб беради.

29. Лицензиянинг амал қилишини тўхтатиш ва лицензияни бекор қилиш «Фаолиятнинг айрим турларини лицензиялаш тўғрисида»ги Ўзбекистон Республикаси Қонунининг 23 ва 24-моддаларига мувофиқ амалга оширилади.

VIII. Лицензиялар реестри

30. Лицензияловчи орган белгиланган тартибда лицензиялар реестрини юритади.

31. Лицензиялар реестрида қуйидагилар кўрсатилиши керак:

а) лицензиатлар тўғрисидаги асосий маълумотлар: юридик шахснинг тўлиқ ва қисқартирилган номи, рўйхатдан ўтказилганлиги тўғрисидаги маълумотлар (рўйхатдан ўтказиш санаси, рўйхатдан ўтказилганлиги тўғрисидаги гувоҳноманинг берилган санаси ва тартиб рақами, СТИР), почта манзили ҳамда мавжуд бўлса телефон, факс рақами, электрон почта манзили;

б) фаолиятнинг лицензияланаётган тури;

в) лицензияларнинг берилган санаси ва тартиб рақами;

г) лицензияларни қайта расмийлаштириш, амал қилиш муддатини тўхтатиб туриш ва тиклашнинг асослари ва санаси;

д) лицензияларнинг амал қилишини тўхтатиш асослари ва санаси;

е) лицензияларни бекор қилишнинг асослари ва санаси;

ж) дубликат беришнинг асослари ва санаси.

32. Лицензиялар реестридаги маълумотлар манфаатдор юридик ва жисмоний шахсларнинг улар билан танишиши учун очиқ ҳисобланади ҳамда аниқ лицензиатлар тўғрисидаги маълумотлар реестрдан кўчирма тарзида ёзма сўров асосида ва сўров учун ҳақ тўланганлигини тасдиқловчи ҳужжат тақдим этилганда уч кун муддатда берилади.

33. Реестрдан бир лицензиат тўғрисида маълумот берилганлиги учун қонун ҳужжатларида белгиланган энг кам ойлик иш ҳақининг ярми миқдориди тўлов ундирилади.

Давлат ҳокимияти ва бошқаруви органларига лицензиялар реестридан маълумотлар текин берилади.

34. Реестрдан маълумот берилганлиги учун йиғим суммаси лицензияловчи орган ҳисоб рақамига ўтказилади.

Истеъмол товарлари улгуржи савдосини
амалга ошириш фаолиятини лицензиялаш
тўғрисидаги низомга
ИЛОВА

Ўзбекистон Республикасининг
Давлат герби

Ўзбекистон Республикаси Адлия вазирлиги

ЛИЦЕНЗИЯ
АА № 000
АА № 000/00*

Мазкур лицензия билан _____ га
(лицензия эгасининг тўлиқ номи)

_____ (фаолиятнинг рухсат берилган тури)

_____ **ни амалга оширишга рухсат берилади.**
Лицензия эгасининг жойлашган жойи (почта манзили): _____

Солиқ тўловчи-лицензия эгасининг идентификация рақами:

Лицензия берилган сана _____ йил _____

Лицензиянинг амал қилиш муддати чекланмаган.

Реестр бўйича тартиб рақами _____

Ваколатли шахс:

_____ (Ф.И.О.)

_____ (имзо)

М.Ў.

* Республика ихтисослаштирилган улгуржи база-конторалари таркибига кирадиган ҳудудий базалар ҳамда «Матлуботсавдо» акциядорлик компаниялари таркибига кирадиган улгуржи савдо корхоналари учун.

БЕШИНЧИ БЎЛИМ

ЎЗБЕКИСТОН RESPUBLIKACI MOЛИЯ BAZИPЛИГИ
ЎЗБЕКИСТОН RESPUBLIKACI ДАВЛАТ СОЛИҚ ҚЎМИТАСИНИНГ
ҚАРОРИ

107 Маҳаллий солиқлар ва йиғимларни ҳисоблаб чиқариш ва бюджетга тўлаш тартиби тўғрисидаги йўриқномага ўзгартиришлар киритиш ҳақида

*Ўзбекистон Республикаси Адлия вазирлиги томонидан 2006 йил
22 мартда 1217-1-сон билан давлат рўйхатидан ўтказилди*

(2006 йил 1 апрелдан кучга киради)

Ўзбекистон Республикаси Солиқ кодекси, Ўзбекистон Республикаси «Давлат солиқ хизмати тўғрисида»ги Қонунининг 7-моддаси ва Ўзбекистон Республикаси Президентининг 2005 йил 27 декабрдаги «Ўзбекистон Республикасининг 2006 йилги асосий макроиктисодий кўрсаткичлари прогнози ва Давлат бюджети параметрлари тўғрисида»ги ПҚ-244-сон қарорига (Ўзбекистон Республикаси Қонун ҳужжатлари тўплами, 2005 й., 52-сон, 386-модда) мувофиқ **қарор қиламиз:**

1. Ўзбекистон Республикаси Молия вазирлиги ва Давлат солиқ қўмитасининг 2003 йил 5 февралдаги 28, 2003-23-сон қарори билан тасдиқланган Маҳаллий солиқлар ва йиғимларни ҳисоблаб чиқариш ва бюджетга тўлаш тартиби тўғрисидаги йўриқномага (2003 йил 16 февраль, рўйхат рақами 1217 — Меъёрий ҳужжатлар ахборотномаси, 2003 й., 4-сон) иловага* мувофиқ ўзгартиришлар киритилсин.

2. Мазкур қарор Ўзбекистон Республикаси Адлия вазирлигида давлат рўйхатига олинган кундан бошлаб ўн кун ўтгач кучга киради.

Молия вазири Р. АЗИМОВ

Тошкент ш.,
2006 йил 24 февраль,
21-сон

Давлат солиқ қўмитаси раиси Б. ПАРПИЕВ

Тошкент ш.,
2006 йил 24 февраль,
2006-10-сон

* Илова рус тилидаги матнда берилган.

ЎЗБЕКИСТОН RESPUBLIKACI MOЛИЯ BAZИPЛИГИ
ЎЗБЕКИСТОН АВТОМОБИЛЬ ВА ДАРЁ ТРАНСПОРТИ АГЕНТЛИГИНИНГ
ҚАРОРИ

108 Автомобиль транспортида йўловчилар ташиш билан шуғулланишга лицензия олишда якка тартибдаги тадбиркорлар томонидан тўланган давлат божини қайтариш ёки ҳисобга қўшиш тартиби тўғрисидаги низомни тасдиқлаш ҳақида

*Ўзбекистон Республикаси Адлия вазирлиги томонидан 2006 йил
28 мартда 1555-сон билан давлат рўйхатидан ўтказилди*

(2006 йил 7 апрелдан кучга киради)

Ўзбекистон Республикаси Президентининг «Автомобиль транспортида йўловчилар ташиш соҳасидаги тадбиркорлик фаолиятининг алоҳида турларини амалга оширишни тартибга солиш тўғрисида» 2006 йил 9 мартдаги ПҚ-303-сон қарорининг 3-бандини бажариш мақсадида Ўзбекистон Республикаси Молия вазирлиги ва Ўзбекистон автомобиль ва дарё транспорти агентлиги **қарор қиладилар:**

1. Илова* қилинаётган «Автомобиль транспортида йўловчиларни ташиш билан шуғулланишга лицензия олишда якка тартибдаги тадбиркорлар томонидан тўланган давлат божини қайтариш ёки ҳисобга қўшиш тартиби тўғрисидаги низом» тасдиқланган.

2. Мазкур қарор Ўзбекистон Республикаси Адлия вазирлигида давлат рўйхатидан ўтказилган кундан бошлаб ўн кун ўтгач кучга киритилсин.

Молия вазирлиги Р. АЗИМОВ

Тошкент ш.,
2006 йил 16 март,
32-сон

**Ўзбекистон автомобиль ва дарё транспорти агентлиги
бошлиғи А. АБДУВАЛИЕВ**

Тошкент ш.,
2006 йил 16 март,
3-сон

* Илова рус тилидаги матнда берилган.

Ўзбекистон Республикаси
Адлия вазирлиги маълум қилади:
вазирликлар, давлат қўмиталари ва идораларининг
умумий мажбурий тусдаги меъёрий ҳужжатларини давлат
рўйхатидан ўтказиш ҳолати тўғрисида
2006 йил 18 мартдан 31 мартгача бўлган маълумот

I. Давлат рўйхатидан ўтказилди:

1. «Маҳаллий солиқлар ва йиғимларни ҳисоблаб чиқариш ва бюджетга тўлаш тартиби тўғрисидаги йўриқномага ўзгартиришлар киритиш ҳақида» *Ўзбекистон Республикаси Молия вазирлиги, Давлат солиқ қўмитасининг 2006 йил 24 февралдаги 21, 2006-10-сон қарори.*

2006 йил 22 мартда 1217-1-сон билан рўйхатдан ўтказилди (2006 йил 1 апрелдан кучга киради).

2. «Автомобиль транспортида йўловчилар ташиш билан шуғулланишга лицензия олишда яқка тартибдаги тадбиркорлар томонидан тўланган давлат божини қайтариш ёки ҳисобга қўшиш тартиби тўғрисида низомни тасдиқлаш ҳақида» *Ўзбекистон Республикаси Молия вазирлиги, Ўзбекистон автомобиль ва дарё транспорти агентлигининг 2006 йил 16 мартдаги 32, 3-сон қарори.*

2006 йил 28 мартда 1555-сон билан рўйхатдан ўтказилди (2006 йил 7 апрелдан кучга киради).

-

+